

M510: Gundacker von Judenburg: Christi Hort

0,1a Daz puech haizt christz hort .
0,1 Got geschuf unt tichte /
0,2 elliū dinch von niht /
0,3 er hieze mit worten w'den /
0,4 paidiv himel und erden .
0,5 Got geschuf an allen orten /
0,6 elliū dinch mit worten /
0,7 Daz tuet uns diu sch'ft chunt /
0,8 dixit et fca- sunt .
0,9 Zehant als er daz wort geschach /
0,10 nach sinem willen ez geschach /
0,11 Die wunnechlichen engel clar /
0,12 geschuf got mit worten gar .
0,13 Daz liez er im gevallen /
0,14 under den engeln allen /
0,15 Do geschuf er ein so wunnechlich /
0,16 des schone was niht . geliche .
0,17 Den nant er do lucifer /
0,18 daz sprichet tiusche ain liechttrager /
0,19 d' erhub sich von d' schone sein /
0,20 "ich setze nordent den stuel mein /"
0,21 sprach er "unt / wil sein gelich /
0,22 dem hohistem got wunnechlich /"
0,23 als er des gedachte /
0,24 e danne er z volprachte
0,25 von himel er v'stozen wart /
0,26 umb die ubrigen hohvart
0,27 unt mit im maniger engel schar /
0,28 die seines trachtens nam- war .
0,29 unt im des gestuenden zu /
0,30 die wurden mit im verstozen du .
0,31a Hie geschuf got adam .
0,31 Als der val dv geschach /
0,32 got dv wider sich selben sprach /
0,33 dv dis' val alsus ergie /
0,34 "nv mach wir ein mensch hie /
0,35 nach vnserm pilde unt uns gelich"
0,36 Den macht er dv gar wennechlich

0,37 ovz d' erden mit seiner hant /
0,38 vnt plis in in zehant .
0,39 Den gaist des lebens an d' stat
0,40 d' gab im sinnes vollen rat
0,41 er macht in schoene vnt wies
0,42 vnt satzt in in daz paradys;
0,43a hie schuef er evam .
0,43 Er sprach "d' mensch ist nicht ein wol
0,44 ain helfer man im machen shol
0,45 Der im gelich von arte si /
0,46 unt geselleclichen won pei ."
0,47 dv macht er dv zehande /
0,48 ein slaf er adam sande
0,49 vnt prach im an den zieten
0,50 ein vip ovz siener sieten .
0,51 Mit fleisch vnt mit plut
0,52 dar ovz machet der gut .
0,53 Ein maget gar wennechlich /
0,54 diu wol eim menschen was gelich .
0,55 schoen mit wiplich' gestalt
0,56 v-t mit tugenden manicvalt
0,57 die weist er zv adam paz /
0,58 er sprach zv im: "w' ist daz /"
0,59 er antrwrt mit sinne /
0,60 "ez ist ein maeninne ."
0,61 er antrwrt von recht . want si von art /
0,62 ovz ir manne gemachet wart /
0,63 Die gab er im dv ze einer e /
0,64 daz si solten immerme /
0,65 sein ein h'ze vnt ein lip /
0,66 paidiv man vnt wip .
0,67 Swer die minne v'cheret /
0,68 vnt sich selben vneret /
0,69 daz er schande suchet /
0,70 den hat got v'fluchet .
0,71 In daz paradise /
0,72 satzte got d' weise .
0,73 adam vnt euen die paide /
0,74 in die wenne waide /
0,75 Vnt gab in d' wollust genukt /
0,76 vnt erlovbt in alle die frucht /
0,77 wan einen pavm er ovz nam /
0,78 "ich gepivt ew pi d' gehorsam /"
0,79 sprach er "daz ir sie n ezzet icht /
0,80 lat ir daz so sterbt ir nicht /
0,81 ist ab daz ir ez ezzet /
0,82 vnt mein also v'gezzet /
0,83 so gebt ir iv dem tode /

0,84 ez chumt ivch an mit sode .
0,85 Hapt vb' daz and' obz wal
0,86 daz nemt selbe an zal ."
0,87 Der tivel daz dv sere neit,,
0,88 eve- er dv an streit .
0,89 Er sprach "eva nv nim war /
0,90 izzes tu daz obze so wirs tu gar
0,91 Dem wennechliche- got gelich /
0,92 vnt wirst aller chunst reich
0,93 dv wirst erchennent vbel unt gut /
0,94 die ougen ez dir ovf tvt ."
0,95 Dv antrwrt im dew tvmbe /
0,96 "wir sterben liecht dar vmbe /
0,97 ob wir daz obz ezzen .
0,98 v-t gotes gebot v'gezzen /"
0,99 Do si so zweiflichen sprach /
0,100 vnd er sei in dem wanche sach /
0,101 zehant er sei bechort /
0,102 dv er den zweivel horte .
0,103 Leviathan d' svnde- list
0,104 rovmt ir zv vntz an die frist .
0,105 biz daz si daz obz az
0,106 vnt pot z adam d' tet ovch daz .
0,107 Dv si daz obz gazen /
0,108 vnt gotes gebot v'gazzen /
0,109 dv sahen si sich ane.and' an /
0,110 ir ietwederz sich schamen began /
0,111 unt prachen Fu r sich ein laup /
0,112 scham vnt vorth machet siv tovp
0,113 si purgen dv ir scham /
0,114 got sprach "wa pist v nv adam /"
0,115 "h're ich horte die stimme dein /
0,116 vnt v'parg mich h're vor dir mein
0,117 Daz weip die dv mir hast geben /
0,118 div hat verraten mir daz leben .
0,119 Von de- weip ez mir geschach /"
0,120 div eva schvldigiv dv sprach /
0,121 "div nater mich von sinnen schiet
0,122 div mir ditz vmpilde riet ."
0,123 Got si da nicht lenger liez /
0,124 ein engel si fur die porten stiez .
0,125 Got flvechte adam des gie im not
0,126 daz er in seim swaiz sien prot .
0,127 immer gewinnen mveste /
0,128 v-t swenne er povt die wueste .
0,129 daz im distel vnt dorn /
0,130 wehse swa er saete chorn .
0,131 D' frowe- fluht er do zwir /

0,132 d' gyt alsyst flucht ir /
0,133 vnt daz si und' den mannen mvest imm' sein /
0,134 vnt smerzen lit vnt pin .
0,135 vnt daz si chint gebaere /
0,136 mit smerzen vnt mit swaere .
0,137 D' fluch wert bis an disen tack
0,138 vnt die schulde div ouf vns gelack /
0,139 dv von dem himel viel lucifer /
0,140 dvrch den val verriet er .
0,141 euen vnt adam /
0,142 da si die gift na- .
0,143 sein val vnser val geriet /
0,144 dar vm got adam schiet
0,145 von dem paradise /
0,146 eva div vnwiese /
0,147 allererste diente den ersten pan /
0,148 daz erste weip den ersten man .
0,149 Allererst in schaden prachte /
0,150 da von der tode vns nachte .
0,151 von dem valle sei wir noch /
0,152 in dem ellende doh
0,153 Der val w't wol fvemf touse-t iar /
0,154 daz niemen was volchome- gar .
0,155 als in d' tot nicht wolde sparn
0,156 lenger so must div sel varn /
0,157 gegen helle alzeha-t
0,158 div minne den val vns hat erwant .
0,159 Div minne mit d' gothait /
0,160 begvnde rovnem want ir was lait /
0,161 daz rovnem daz leuiathan /
0,162 het mit even getan .
0,163 Daz wolt si wid'rovnem /
0,164 des begvnd ir slounen .
0,165 Ir rovnem unt ir ringen /
0,166 chvnde die gothait betwingen /
0,167 daz er sich erpitte- liez .
0,168 Daz er enphie / daz er wart nie .
0,169 vnt belaib daz er was e /
0,170 vnd ist daz er was immerme .
0,171 Got vater h're ich nige dir /
0,172 nv scheffe ein rainez herze mir .
0,173 Erniv in mir deinen gaist
0,174 want dv mein gepresten wol waist /
0,175 daz ich pin siech v-t chranch
0,176 mein herz tvet manigen wank
0,177 Von dir svezer h're /
0,178 daz mich dir machet v're .
0,179 nv nahen mich dir suzer got

0,180 daz ich iht w'de des tivvels spot .
0,181 des pitte ich inerschlichen dich
0,182 nicht v'wirfe h're mich
0,183 von deinem antlutze liecht /
0,184 emphroemde mir deinen gaist niht
0,185 Gib mir die vrevde deines hailes wid' .
0,186 vnt leg mir suntleich trovren nid' .
0,187 Vnt la mich dir erbarmen
0,188 mich Gvndachern vil armen /
0,189 Von iudenburch pi- ich geborn:
0,190 sei iemen mein geticht zorn .
0,191 Der tichte selbe ein anderz paz /
0,192 daz laz ich gar ane haz .
0,193 die wiele sol er sein spoten sparn
0,194 biz wir daz sein recht ervarn .
0,195 ob ez so dvrchleutich sei /
0,196 daz ez gar sei gespotes vrei .
0,197 swer von tieffer materi sol /
0,198 spreche- d' bedarffe wol /
0,199 genade vnde sinne /
0,200 vnt gotlicher minne /
0,201 vmb dise materi ez also stat /
0,202 swer nicht gute sinne hat
0,203 vnt genade von got
0,204 daz d' wol mak v'dienen spot /
0,205 daz furcht ich svendhaft' man /
0,206 wand ich nicht gveter sinne han .
0,207 Vnd ist diu materi sinnereiche /
0,208 vnt so gar ernstliche
0,209 daz da niht horet gespotes zv /
0,210 swer aber ez dar vb' tve .
0,211 Daz er spotes sich bewegt /
0,212 vnt der maze alsus v'phlegt .
0,213 D' spote dehaines andern man /
0,214 heb an im selbem des ersten an .
0,215 An im selbem ist gespotes vil
0,216 ob er ez ze rechte wegen wil .
0,217 swer geistilich gedinge /
0,218 spot ob dem gelinge .
0,219 daz en han ih da fur nicht /
0,220 swer sich selben an sicht .
0,221 D' spot fvrpaz nicht mere /
0,222 im git gewis lere /
0,223 sein selbs gewizzen /
0,224 wie er sich hat gevlizzen
0,225 paidiv ovf vbel vnt ouf gvt
0,226 div gewizzen im daz chvnt tvt .
0,227 Owe svezer iesu christ /

0,228 wie v're mir dein gnad ist /
0,229 daz ist von den schvlden mein /
0,230 daz ich die gnade dein
0,231 nie ze reht geschvet an dich /
0,232 du pist so gvt daz dv mich /
0,233 gnaden dick hetst gew't /
0,234 ob ich ir chvnde hete gegert .
0,235 Des gib ich mich dir schvldich /
0,236 nu wis gegen mir gedultik .
0,237 dvrch dein groz gvete /
0,238 sterche mir mein gemuete
0,239 daz ich an disem getihtē /
0,240 dein lob mit lob berichte /
0,241 Dein chraft mir des v'henge /
0,242 dein minne mich des enphenge /
0,243 Vnt erlevht mir de- sin /
0,244 want ich so wizick nicht en pin /
0,245 Daz ich dich loben chvenne /
0,246 mein trost vnt mein wenne /
0,247 pist u lieber h're mein /
0,248 nv tv mir deiner gnade schein
0,249 daz ich dich loben mvege /
0,250 daz ez deinen eren tvege .
0,251 Ich man dich got almaechtich /
0,252 dv drei vnt doch aingaehtich /
0,253 Daz div minne mit dir ra-c /
0,254 div dich ovf menschliech hail bedwanc .
0,255 Daz dv den himel entslvze /
0,256 vnt her nider flvze /
0,257 do enphieng dv die menschait
0,258 in vnser arme forme chlait
0,259 Dvrch vnsern val choem dv h' nid' /
0,260 daz dv vns da von lostes wid' .
0,261 Den vns ovf pracht adam
0,262 mit seiner vngheorsam .
0,263 dar an vns allen mislanc /
0,264 des valles der erst val vns twanc .
0,265 Da von der fluch ovf uns gelac .
0,266 diu minne des flvches vns gewac .
0,267 Des schul wir lob d' minne sagen /
0,268 daz si vns des hat vb'tragen /
0,269 von d' minne vnt von got
0,270 wart h' ab gesant ain pot /
0,271 Durch den grozen val der sel /
0,272 d' engel sant gabriel .
0,273 In die stat ze nazaret /
0,274 ze d' maid die man enpheste-t het
0,275 ainem manne d' was yoseph genant /

0,276 von davides geslecht erchant /
 0,277 Maria deu / magt hiez /
 0,278 d' engel des dvo / nith en liez /
 0,279 da er die magt sitzen sach /
 0,280 er gie zv ir in v-t sprach /.
 0,281 Aue gracia plena /
 0,282 "wis gegrvzet" sprichet daz da /
 0,283 volle genade dv pist /
 0,284 vnser herre mit dir ist /
 0,285 gesegent seist u vber elliv wiep /
 0,286 von dem wort wart ir lip /
 0,287 Betrvtbet vnt gedacht "waz /
 0,288 grvezes mack wesen daz ."
 0,289 Der engel sprach vnt nant sei da /
 0,290 "furchte dir nicht Maria /
 0,291 du hast genad fvnden /
 0,292 ze got an disen stunden /
 0,293 sih dv enphaehst vnde gebirst /
 0,294 einen svn des mvt' du wirst /
 0,295 Den solt v nennen iesum /
 0,296 d' wirt hoch vnt frvm /
 0,297 Des obristen svn wirt er genant /
 0,298 got geit im den stvel zehant /
 0,299 seines vater dauides /
 0,300 er wirt frid ewiges nides .
 0,301 Vnt wirt rihsent ewichlich /
 0,302 in iacobs hofs vnt sin reich /
 0,303 daz gewinnet ende niht ."
 0,304 Maria sprach ze dem engel liecht /
 0,305 "wie chvmt daz denne /
 0,306 want ich mannes nicht erchenne /"
 0,307 Der engel antwrt vnt sprach zv ir /
 0,308 "d' hailige gaist chvmt vf von dir /
 0,309 d' obristen tvegent beschetwet dich /
 0,310 vnt dar vm frowe sich /
 0,311 ein vrie ros ain svnd' dorn /
 0,312 daz von dir wirt geborn /
 0,313 Gotes svn wirt er genennet /
 0,314 wol im der in erche-net /
 0,315 vnt sich Elspet div niftel dein hie /
 0,316 ein svn in ir alt' enphie /
 0,317 vnt was ir zal doch vz d' chraft /
 0,318 daz si nv hiez vnberhaft /
 0,319 want got ist nicht vnmvegliech ."
 0,320 Dv sprach Maria "nv sich /"
 0,321 zv dem engel "ich pin ein dirn gots /
 0,322 gehorsam alls seines gebots .
 0,323 Nach deinem worde ez mir erge /"

0,324 zehant / wart in ir svnder we /
0,325 Ein ga-zer mensch vnt warer got /
0,326 von d' minne gebot .
0,327a hie wart got mensh .
0,327 Ich man dih svezer ih-u christ /
0,328 daz dv d'ch mich mensch worden pist /
0,329 nv behvet mich lieber herre mein /
0,330 dvrch die rainen menscheit dein /
0,331 Daz mich meins broeden flaisches gir /
0,332 h're mein niht v're dir .
0,333 Ich man dich aller engel lob /
0,334 abrahames isaac iacob /
0,335 daz dv hie ovf d' erden /
0,336 geboren woldest w'den /
0,337 von Marien der meide /
0,338 div dich an scham v-t an leide /
0,339 magt enphie vnd magt genas /
0,340 als dvrch daz ga-ze geworhte glaz /
0,341 scheint div svnne clar /
0,342 ze glicher wise si dich gebar /
0,343 an scham vnt ane we /
0,344 ich man dich dennoch me /
0,345 Gewaltich chaiser reiche /
0,346 daz dv so smacheliche /
0,347 woldest ligen vf einem haev /
0,348 da dv w' vnd' strev /
0,349 des esels vnd des rindes; /
0,350 so w'des stalgesindes /
0,351 wart nie nicht fvnden ze dehainer ceit /
0,352 an dem so volle ere leit /
0,353 Doch chant d' esel vnt daz rint /
0,354 an dir des waren gotes chint .
0,355 Da dich die vihirt fvnden /
0,356 da dv laeg in gebunden .
0,357 In swachiv chlainiv tvechelin /
0,358 des ewige- vater schein /
0,359 vnt aller engel vrevde /
0,360 vnt des frides ein beschevde .
0,361 Hilf mir dvrch deiner gebvert chraft /
0,362 daz in mir w'de berhaft /
0,363 des niwen leben saelicheit /
0,364 daz mein sel da mit w'd gechleit /
0,365 daz ich von svnden w'de geboren /
0,366 daz mich a m ivngisten tage /
0,367 iht dein zorn . mveze schaiden /
0,368 vo- den lieben zv den laiden .
0,369a da ist got Besnitten .
0,369 Ich man dich nach d' schrifte / sage

0,370 daz man dich a m achtem tage
0,371 nach d' alten e besneit /
0,372 da dv mit groz' senfticheit
0,373 v'guzze dein vil raines plvet
0,374 durch mich h're gvet /
0,375 des gaeb dv die harre an mir /
0,376 des solt ich imm' danchen dir /
0,377 ob ich waere so witzich /
0,378 nv pin ich inhizich /
0,379 von svnden manig' hande /
0,380 d' ich mich laid' nie erchande .
0,381 ze rechte nv pitte ich dich /
0,382 daz dv rvchest erhoren mich /
0,383 durch diene besneidunge /
0,384 daz ich mein gervnge /
0,385 also besnide- mvez
0,386 daz mir immer vnsveze /
0,387 aller hande vnchivsche sei /
0,388 des wir mir helfechlichen pei . ame- .
0,389 Ich man dich daz div mvter dien /
0,390 dich sovget vz ir prvestelin /
0,391 vnt dich vil dicke chveste /
0,392 do dv ir laege ovf ir prveste /
0,393 Des la mich geniezen /
0,394 unt laz i- mien sel fliezen /
0,395 die milch diner menscheit /
0,396 vnt daz honik diner gothait /
0,397 daz ich gefvret w'de da mit /
0,398 mit svzem vaterlichem sit .
0,399a Da wart vns'm h're- opf't
0,399 Ich man dich aller engel cir /
0,400 daz dv die heiden enphie zv dir /
0,401 gewaltichlich hoher chunige drie /
0,402 von saba v-t von arabi /
0,403 die dir ir opher prachten /
0,404 zehant si des gedachten /
0,405 do si den stern sahen /
0,406 do begunden si zv dir nahen /
0,407 ze ierusalem pracht si d' stern /
0,408 dich vnt dein mveter si sahen gern /
0,409 in daz hovs si giengen /
0,410 mit opf' si dich enphiengen .
0,411 Si vielen fvr dich vf iriv chnie /
0,412 ditz opfer si prachte- dir hie /
0,413 Golt . wiroh . vnt mirre-
0,414 des mochte siv niemen verirren .
0,415 daz golt als dem chvnik groz /
0,416 d' willich eren genoz /

0,417 daz wiroh als dem warem got /
0,418 si waren gehorsam dienem gebot /
0,419 die mirren ze eren dienem begraben /
0,420 die gab die araben vnt die sabe- .
0,421 willichlichen prachten dir /
0,422 nv hilfe helfechlichen mir /
0,423 daz ich dir ovch mveze pringen /
0,424 mein opfer an disen drigen dingen .
0,425 Daz golt d' waren / minne /
0,426 daz div in mir enbrinne /
0,427 Die andacht des wirovchs
0,428 des svzisten rovches /
0,429 vnt die mirren d' bvze /
0,430 daz ich mich selben vnsvze /
0,431 chestige vm alle mein sunde /
0,432 mit rechter pvze vrchvnde .
0,433a hie wart Got in te-pel pracht .
0,433 Ich man dich h're gvter /
0,434 daz dich dien liebev mvte' /
0,435 zv dem tempel pracht nach d' e /
0,436 vnt and' deiner vrevnde me /
0,437 Simeon ovch dar cham /
0,438 vf die armen er dich nam /
0,439 do dich d' alt an sach /
0,440 er lopt dich hohe v-t sprach /
0,441 "dv solt mich niht leng' sparen /
0,442 la dinen chnecht ze / gemache varen /
0,443 want meiniv ovgen habent gesehen /
0,444 a- dir des waren liechtes brehe- /
0,445 Daz dvrrhlichtichlichen gar /
0,446 erleuchtet alle die w'lt fvr war /"
0,447 Mariam er do an sach /
0,448 er wiessagt ir vnt sprach /
0,449 "dein sel sien swert dvrrhvert /
0,450 da von dir / smerze wirt beschert"
0,451 Hie mit wrd dv h're / pracht /
0,452 in den tempel mit andacht
0,453 mit dir zwei tvrteltevbelin /
0,454 ze eren got dem vater dien /
0,455 Nv hilfe mir dvrrch dine gvete /
0,456 daz ich mit lovterm gemvete /
0,457 mich dir opfern mveze /
0,458 des gew' mich h're sveze Amen .
0,459a Hie floh vns' frowe in egipt
0,459 Ich man dich svezer herre /
0,460 daz dien mut' v're /
0,461 mit dir in Egipten floch /
0,462 div dih mit ir milch zoch /

0,463 in die stat ze ereinpolim /
0,464 als ich z von der / schrift nim /.
0,465 Dar inne dv siben jar belibe /
0,466 vnt elliu apgot h' ouz v'tribe /
0,467 da waer dv mit vil grozer gedult /
0,468 daz d' wiessagen wort wrde erfvl't /
0,469 D' von dir schreibt also /
0,470 "ich han ovz egipto /
0,471 minen lieben svn geladen /"
0,472 geruche mir die wege phaden /
0,473 ovf den ich minen veinden enphar
0,474 der werlt vnt dem tivel gar /
0,475 vnt mir selbem widerste /
0,476 daz ich d' werlt nith nach ge . Ame- .
0,477 Ich man dich svezer iesu clar /
0,478 daz dv vber siben iar /
0,479 wid' fver ze ivda /
0,480 vnt belibe in galilea /
0,481 in der stat ze nazareth /
0,482 als da geschriben stet /
0,483 "er wirt nazareus /
0,484 gehaize-" daz bedivtet sich sus .
0,485 Ein plvem von plvemen wirt er genant .
0,486 also tvet vns div schrift becha-t /
0,487 Nv pringe mich svezer herre wider /
0,488 want ich lig in svnde- nider /
0,489 nv hilf mir vz d' sunde- phat /
0,490 daz ich chom in d' plveme- stat /
0,491 vnt dar inne w'd gezoge- /
0,492 want mich diu werlt hat betrogen .
0,493a Hie lert Got die ivden /
0,493 Ich man dich h're mere /
0,494 daz dv mit svezer lere /
0,495 daz volch in deiner chinthait /
0,496 lertest rechte wishait /
0,497 ez geschach ze ainer hohceit /
0,498 als u-s div schrift vrchvnde git /
0,499 Daz die ivden alle /
0,500 ze ierusale- mit schalle /
0,501 chomen nach irn gewonhait /
0,502 als in vf was gelait .
0,503 Dein mveter vnd d' vater dein /
0,504 chomen ovch dar mit dir h're mein /
0,505 da verlvrn si paide dich .
0,506 Maria div v'waente sich /
0,507 dv waerest pei joseben da /
0,508 ioseph vant Maria
0,509 het dich pei ir in phlege /

0,510 alsus giengen si vf dem wege /
 0,511 vo- danne in dem wane /
 0,512 doch waren si dein ane /
 0,513 ganzer tage drei /
 0,514 ioseph vnt Marei /
 0,515 dich svechen begu-den /
 0,516 in dem tempel si dich funden /
 0,517 Da dv daz volch lertest /
 0,518 dar an dv dein vleiz chertest /
 0,519 Dv dich dien mveter an sach /
 0,520 gvetlichen si zv dir sprach
 0,521 “svn wie taet dv vns also /
 0,522 ich vnt dein vater sien vnvro /
 0,523 svechent gewesen vm dich /”
 0,524 “was ist daz ir svechet mich /
 0,525 west ir nicht daz ich mveze sin /
 0,526 an dem geschaeft des vater mein /”
 0,527 hie gie dv mit in dan /
 0,528 vnt wer in paiden vnd’tan /
 0,529 sw’ dich noch v’lorn hat /
 0,530 d’ svech dich daz ist mein rat .
 0,531 da ze chirchen vint er dich schir /
 0,532 ob ze svechen stet sien gir .
 0,533 Owe h’re hoh geboren /
 0,534 wie dichke ich dich han v’lorn /
 0,535 mit meinen / svnden daz ich /
 0,536 wid’vinden mveze dich /
 0,537 als dich din liebev mvter tet /
 0,538 nv erhore h’re mein gebet /
 0,539 Unt gib mir die lere /
 0,540 das ich gesvnd nimmer mere /
 0,541 v’liese mit den sunden mein
 0,542 nv la mich h’re wesen dein . Amen .
 0,543a hie wart Got getovft .
 0,543 Ich man dich h’re lichtgevar
 0,544 daz dv vber drizech iar /
 0,545 den toffe woldest enphahen /
 0,546 dv dir begynde nahen /
 0,547 Johannes baptista /
 0,548 d’ zaiget dich mit ving’ da /
 0,549 “secht daz ist gotes lamp daz trait /
 0,550 der werlde svnde vnt lait /”
 0,551 Do tovfet dich in dem iordan /
 0,552 iohanne% s d’ vil hailig man /
 0,553 die himel stveden offen ob dir /
 0,554 des vater stimme hort man da schir /
 0,555 “Ditz ist mein svn an dem ich mir /
 0,556 pin wolgevallen dem schult ir /

0,557 horen" sus d' vater sprach
0,558 in d' menschait man dich sach /
0,559 Da wart gesehen d' hailig gaist /
0,560 in tovbēn wies mit vollaist /
0,561 sih alhie div t'nitat /
0,562 vil wennechlich gesamt hat
0,563 Nv hilf mir h're dvrch dienen tovf /
0,564 daz ich deines raines plvtes chovf /
0,565 an mir nicht w'de v'lorn /
0,566 mich stichet reht als ein dorn /
0,567 daz ich svndhafter man /
0,568 meine- tovf so dick gemailt han /
0,569 mit manigen svnden posen /
0,570 von de- ruch mich erlosen .
0,571a Hie vast unser h're .
0,571 Nu man ich svez' herre dich /
0,572 daz dv gevastest hast fur mich /
0,573 vierzich tage vnt vierzich nacht /
0,574 dve hvngert dich nach menschen aht
0,575 Dar an dv menschen brode waist /
0,576 do furt dich d' hailig gaist /
0,577 in die west mit im dan /
0,578 da dich d' tivel v'svechen began /
0,579 er gie zv dir da er dich sach /
0,580 listechlich er zv dir sprach /
0,581 also v'suchte d' pose dich /
0,582 "seist u z gotes sun so sprich /
0,583 daz dise steine w'den prot /"
0,584 din mvnt im svezliche rede bot /
0,585 Dv sprech als vns div schrift gith /
0,586 "d' mensh lebt alaine nicht /
0,587 von dem prot svend'bar /
0,588 wan von gotes Worten gar ."
0,589 Do fverte dich d' sathanat
0,590 in die hailigen stat /
0,591 vf ein hohes palas /
0,592 daz hoehist daz in der stat was /
0,593 er sprach zv dir "la dih hin nid' /
0,594 dv chvmst wol gesvnt wid' /
0,595 ich han gebotten den engeln dien /
0,596 daz si din hvetunde sien /
0,597 daz dir icht gew're /"
0,598 Dv antwurst im h're /
0,599 ez ist geschriben "dv ne solt nicht /
0,600 dienen herren diene- got v'suechen an iht /"
0,601 Dv fverte er dich dv daz geschach /
0,602 vf eine- hohen perch vnt sprach /
0,603 "ich gib dir al div reiche /

0,604 ob dv diemvetichliche /
0,605 fvr mich vellest vnt an petest mich an /”
0,606 dv spraech dv nv “var hin sathan /
0,607 dv solt wan ein got an / bete- /
0,608 vnt dem dienen an alle- steten /
0,609 als da stet geschriben /”
0,610 dv hiet dv in schir v’triben .
0,611 dv liez er dich dv cha- dir schir /
0,612 die engel vnt diene- dir
0,613 nv hilf helferiche /
0,614 daz ovch ich gewaltichliche /
0,615 d’ werlt dem tivel an gesig /
0,616 vnt mir selbe ob gelig /
0,617 vnt d’ bechorunge .
0,618 dvrch dine barmunge /
0,619 die mich in svnden dicke /
0,620 prachten vnt in stricke /
0,621 daz ich wart gar vnfuerick /
0,622 da von mein sel mverick /
0,623 ist dick in svnde- worde-
0,624 die sah man mich ie horden /
0,625 nah allem meine- geluste gar /
0,626 da von ward ich nebelvar /
0,627 daz mir lvtzel liechtes shein /
0,628 vnt h’tes herzen als ein stain /
0,629 gegen dir svezer herre mein /
0,630 want daz div barmvn dein /
0,631 mich ovf gehabt hat /
0,632 mein w’ nimmer worde- rat /
0,633 swie ez mir noch shvel ergen /
0,634 daz mvez da ze dinen genaden sten .
0,635a Da gie Got d’ werlt predigen
0,635 Ich man dich daz dv hast erlitten /
0,636 groz armuet mit senften sitten /
0,637 Do dv hie / predigen gie /
0,638 vnt die ivnger zv dir enphie /
0,639 die zwelfpotten vnt die ivng’ /
0,640 die dvrst vnt hvnger /
0,641 dvrch dich litten gern hie /
0,642 vnt swaz siv not an gie .
0,643 dv erwelt s vz all’ d’ werlde gar /
0,644 daz si waren svnd’bar /
0,645 vber allez menschlich geslaecht /
0,646 richter nach recht .
0,647 svezer h’re nv enphahe ovch mich /
0,648 ze ainem ivng’ daz ovch ich /
0,649 dir immer gehorsam /
0,650 vnt dine- wennechlichen nam /

0,651 stete immer gehugde trage /
0,652 vnt mich d' w'ld gar entzage .
0,653 Ich man dich herre gvt /
0,654 daz dv so groz armvet /
0,655 in dirre w'lt erlitten hast /
0,656 vnt so dick arm' gast /
0,657 Bist u gewesen gewaltichlich /
0,658 vnt dv doch vber elliv rich /
0,659 gewaltich chvnich vnt h're pist /
0,660 vnd allez vnd'tan ist /
0,661 swaz chrivchet flivzet flevget /
0,662 od' pain ze d' erde pevget /
0,663 vnt liez dich doch hohen fvrste- /
0,664 hie hvngern vnt dvrsten /
0,665 Vnt ovch durch mich friesen /
0,666 daz woldest dv dar vmb chiesen /
0,667 Daz dv daz v'lorn schaefelin /
0,668 wid' preachttest an die fvre sien /
0,669 Mach mich lieber h're frvet /
0,670 vnd gib mir willige armvet /
0,671 mach mich armes mvtes /
0,672 daz ich dehaines gvetes
0,673 immer icht gedenche /
0,674 daz mein sel chrenche /
0,675 dvrch dine groze gvete /
0,676 nider mir mein gemvete /
0,677 daz ie nah d' w'ld stuent /
0,678 ich tet noch als die toren tvent /
0,679 mir was mit hohvart wol /
0,680 div mir armvet nidern sol . Amen .
0,681a hie wart got ze hovs geladen .
0,681 Ich man dich svezer herre me /
0,682 do dv ze bethanie /
0,683 chom in gegangen /
0,684 da wrde dv schone enphange- /
0,685 von ainem d' was symon genant /
0,686 vnt was ovzezich bechant /
0,687 mit dem aez dv alle da /
0,688 Maria magdalena /.
0,689 Ein hohe svend'rinne /
0,690 div wart dein da inne /
0,691 si hveb sich alzehant /
0,692 da si dich in dem hovs vant /
0,693 zv dir si paltlich gie /
0,694 vnt viel fvr dich ovf iriu chnie /
0,695 groze revwe si bescheinte /
0,696 vf die fveze si weinte /
0,697 ir zaeh' gaben so groze- val /

0,698 daz die fvze ublich /
0,699 da mit entwich die clar /
0,700 vnt si trvchent si mit ir har /
0,701 Ir hercenriwe die was groz /
0,702 ovf dein hovbet si dir goz /
0,703 eine salben die smacht so wol /
0,704 daz daz hoves wart so vol /
0,705 des svzisten gesmachs /
0,706 “owe des vngemachs /”
0,707 sprachen die / ivnger “was flvst ist daz /
0,708 waer daz nicht v’chavft paz /
0,709 vm dri hvndert phenninge vnt me /
0,710 v-t w’ den armen gegeben e /
0,711 Danne disiv w’ geschehen /”
0,712 da gege- die mvnt begvnde iehen
0,713 “die frowe hat nicht vbel getan /
0,714 ir mvegt ze allen zeiten niht han /
0,715 die armen des mvegt ir mich nicht /
0,716 Ez ist geschehen ze ainer geschit /
0,717 si hat ez getan ze hvge mir /
0,718 dar vmb spricht nicht vbel ir /”
0,719 Symon d’ wirt gedacht /
0,720 dem ditz ovch v’smaht /
0,721 “waer dirre ain wissage als man seit /
0,722 so het er wol die weisseit /
0,723 Daz er bechande ditz svndic wip /
0,724 die da rveret sinen lip /”
0,725 Do antwrt dv h’re min /
0,726 zehant de- gedanken sien /
0,727 “Symon ich han dir ze sagen /”
0,728 “maist’ sprich so wil ich dagen /
0,729 Ir hoer gern dien maere /”
0,730 “ez waren zwene schvldigaere
0,731 die solten gelten vnt heten nicht /
0,732 als noch dick geschit /
0,733 Einem richem porgaere /
0,734 ez was in paiden swaere /
0,735 Der ain solt niht ringe /
0,736 want fvemf hvndert phenninge /
0,737 er daz in dem herzen wac /
0,738 want er sorge- dr vmbe phlag /
0,739 d’ and’ solt wan fvemzich dar /
0,740 dv liez er in paide- gar /
0,741 sag welcher solt in lieber han /”
0,742 “der als ich mich v’stan /
0,743 de- er me schueld v’lie /”
0,744 “nv hast recht nv sich hie /
0,745 ditz weip chom her in /

0,746 vnt dv gewnne nie den sin /
0,747 daz du mir in dem hovse dien /
0,748 gaebest wazz' zv den fvezen mein .
0,749 die hat si mit ir zaehher entwagen /
0,750 ich wil dir furpaz sagen .
0,751 dv chvst mich nie an minen mvnt /
0,752 si hat mine fveze al stvnt
0,753 chvssens nie gelovbet /
0,754 dv silbe mir nicht mein hovbet /
0,755 mit oel hat si mein fveze /
0,756 gesalbet mit salbe sueze ."
0,757 Da mit h're cherst dv dich /
0,758 gegen ir vnt spraech "maria nv sich /
0,759 dine svnt sint dir gar vergeben /
0,760 ginc dv solt mit frid leben /
0,761 want dv so sere mi-nest /
0,762 da von dv frid gewinnest /"
0,763 sust wart si aller ir svnde erlost /
0,764 christ h're der svnder trost /
0,765 la mich genaden vinden /
0,766 nv rvch ovch mich enpinden
0,767 Von meiner hohen svnden pant /
0,768 vnt tv mir din frid bechant /
0,769 want ich ze lange geslaffen han /
0,770 in svnden da mich niemen chan /
0,771 von zerlosen wan dv alein /
0,772 daz wol an dir frowe- schein .
0,773 Die dv so gahes trostes /
0,774 vnt von sibe- veinden erlostes /
0,775 den gedinge- han ovch ich /
0,776 daz ovch dv losest mich .
0,777 Nv sende mir durch din triwe /
0,778 so gar volchomen riwe /
0,779 daz ich als div sveze /
0,780 min svend bewainen mueze /
0,781 mit als revwigen hercen /
0,782 daz si mich also mvezen smercen /
0,783 daz mein ovgen wazzers vnde /
0,784 v'giezzen vmb die sunde /
0,785 vnt swaz ich herre han getan /
0,786 des la mich hie ze puze stan .
0,787a hie erschain got pi de- m'
0,787 Ich man dich h're lobesam /
0,788 daz dir was gehorsam /
0,789 swaz iemens sin bevahen mach /
0,790 vnt des wilden meres wac /
0,791 ovf dem dv gieng herre mein /
0,792 eins nahtes zv den ivngern din /

0,793 Da in tet maniges windes stoz /
0,794 ovf dem seffte worhte groz .
0,795 div gie also ovf dem lande /
0,796 dehain ivng' dich bechande /
0,797 Dv si dich sahen zv gen /
0,798 siv begynde groze vorhte besten /
0,799 daz si schriren lovte /
0,800 din sti-me in pedovte /
0,801 Dv spraech "niht fvrht iv ich pin z christ /"
0,802 sande peter sprach "ob dv ez pist /
0,803 so haiz mich vf daz wazz' zv dir /
0,804 gen" dv spraech "chvm h' zv mir ."
0,805 Dv gie dv alzehant da hin /
0,806 dv cho- ein groz' wint gegen in /
0,807 dv chom in groziu vorht an /
0,808 zehant er sincken pegan /
0,809 dv rveft er vnt ma-t dich /
0,810 er sprach "herre nv lose mih /"
0,811 Dv begrif dv in pei d' hant /
0,812 vnt zveg in ovz alzehant /
0,813 dv spraech dv "chranckes gelovben pist dv
0,814 war vmb hast dv / zwivelt nv /"
0,815 Dv gie zv in dv gelack d' wint /
0,816 "dv pist des waren Gotes chint /"
0,817 also sprachen die ivnger dv /
0,818 nv tue mir herre ovch also /
0,819 vnt rek mir helflichen din hant /
0,820 vnt tve mir diner helfe bechant /
0,821 Uon disem wage mich erheb /
0,822 want ich iamerlichen sweb
0,823 vf disem wtendem mer /
0,824 din genad mich erner /
0,825 mich tribent die winde entw' /
0,826 iezv hin iezv her /
0,827 Da von ich dicke sincke /
0,828 hilf e ich ertrincke /
0,829 ginc in daz siffelin zv mir /
0,830 so geligent die winde schier /
0,831 ich mein d' svnde winde /
0,832 die mich dicke swinde
0,833 vf der werlde mers wage /
0,834 tribent in veindes lage /
0,835 mit pose- gedancken /
0,836 dv waist mich h're so chrancken /
0,837 daz ich den niht mack widersten /
0,838 dv wellest zv mir in z schifel gen /
0,839 ich main in meins herzen grvnt /
0,840 so sten ih uf unt pin gesunt . Ame- .

0,841a hie spiset vnser h're fumf tovsent mensh .
0,841 Ich man dich herre wise /
0,842 daz dv mit lvetzel spise /
0,843 als ich daz gelesen han /
0,844 spisest fumf tovsent man /
0,845 ane wip / vnt ane chint /
0,846 die nicht in d' zal sint .
0,847 d' ovch vil an d' stat /
0,848 von d' spise wrden sat .
0,849 Von fvmf proten girstein /
0,850 die het ain d' ivnger dien /
0,851 vnt ovch von vischen zwein /
0,852 dar an din gothait schain /
0,853 Dv si alle gazzen genveck /
0,854 daz man dennoch von in trveck /
0,855 d' prosem zwelf choerbe vol /
0,856 vnt heten doch gaz alle wol .
0,857 Nv rvech mich h're spisen /
0,858 mich arme- vn wisen /
0,859 mit den prosem des ist mir not /
0,860 wand ich han der genaden prot /
0,861 laid' dicke v'worcht /
0,862 dv svnd ich vnervorht /
0,863 Nv rvech mir genade gebe- /
0,864 daz ich ovch mvz leben /
0,865 mit rainem gemvete /
0,866 dvrch deine vaeterliche gvete . amen .
0,867a Hie gie vnser h're vf de- perch ze tabor .
0,867 Ich man dich lieber h're mein /
0,868 daz dv mit drin ivngern dien /
0,869 Gie vf den perc ze tabor peten /
0,870 als du taet an manigen steten /
0,871 Peter was d' aine /
0,872 der ander iohannes d' raine /
0,873 der drite iohans prvd' iacob /
0,874 die dir dicke sagten lob /
0,875 dv ir chomet oben ovf den perck /
0,876 dv erzeigst dv gotlichiv werck /
0,877 dv v'wandelst dv dich vor in
0,878 daz nicht bevahen mocht ir sin /
0,879 Dein antltz gab nah sunne-schin
0,880 da wart daz gewant dien /
0,881 licht vnt wiz als ein sne /
0,882 da geschach dennoch noch me /
0,883 da erschain als ich ez las /
0,884 moyses vnt helias .
0,885 Die reten mit dir da /
0,886 do sprach sand peter sa /

0,887 “wir muege- wol hie genesen /
 0,888 vns ist gvt hie daz wesen /
 0,889 ich gesach so wennechlich stat nie /
 0,890 mach wir driv gezelt hie /
 0,891 dir einez daz ander moyse /
 0,892 vnt daz drit helie /”
 0,893 Ovz einer liechten wolcken sprach /
 0,894 des vater stimme do daz geschach /
 0,895 “ditz ist mein sv-n an dem ich mir /
 0,896 pin wol gevallen dem schvlt ir /
 0,897 willichlichen hoeren /”
 0,898 div vorhte begvnd toeren /
 0,899 die ivnger daz si vielen nid’ /
 0,900 dv rvf si vnt troetest si wid’ /
 0,901 “wol vf wir schvlen hinne gen /”
 0,902 dv sahen si da nieme- sten .
 0,903 wan dich iesum aleine /
 0,904 dv spraech dv h’re reine /
 0,905 “ir shvlt der geschit gedagen /
 0,906 vnt niemen nictes da von sagen /
 0,907 vntz des menschen sun erste /
 0,908 vom dem tode vnt nicht e .”
 0,909 Nv erlevht mir lieb’ h’re gvt
 0,910 mein valschen wanckelnmvet .
 0,911 vnt erschien mir in dem herzen mien /
 0,912 mit d’ genade sv-ne dien /
 0,913 v’wandel dvrch dine gvete /
 0,914 min vil vnstaetes gemvete /
 0,915 ze ewiger staetichheit /
 0,916 daz ich dir dienstes si bereit /
 0,917 alle nacht vnt alle tage /
 0,918 vnt nimm’ lobes dines gedage . Amen .
 0,919a hie hiez got drei toten vf sten .
 0,919 Ich man dich herre tvegenthaft /
 0,920 daz dv mit goetlicher chraft /
 0,921 dri toten hiez vf sten /
 0,922 zv dem ersten woldest dv gen /
 0,923 in daz hovs daz was ein magt /
 0,924 eins fursten tocht’ als man sagt .
 0,925 Von d’ sinagoga /
 0,926 di hiez dv ersten alda /
 0,927 vnt gervchst dem vater wid’ geben .
 0,928 dem andern gaebe du daz leben
 0,929 Ze ierusalem- an d’ porte
 0,930 d’ was als ich ez horte .
 0,931 Einer svn d’ mvter sin /
 0,932 diu vm in tet groze chlage schin /
 0,933 dv dv gegen dir saehe trage- /

0,934 vnt dv vernaeme grozez chlagen
0,935 Dv gie dv gegen im an d' stat /
0,936 div mvter dich genaden pat /
0,937 gegen d' bare begynde dv gen /
0,938 vnt hiez den ivngelinc vf sten /
0,939 dv er saz der e was tot /
0,940 dv wart geringet d' mvter not
0,941 want si von alle ir laide schied /
0,942 dar vm lobt dich elliv diet /
0,943 Den driten hiez dv ersten alsus /
0,944 daz was din vrevnt lazaruus /
0,945 d' da nach d' schrift sage /
0,946 dri tag im dem grabe lage /
0,947 dv gie dv zv dem grabe /
0,948 vnt hiez den stain nemen ab /
0,949 daz geschach man tet in hin /
0,950 dv wainst dv vnt rvfst dar in /
0,951 "lazare stand vf vnt chvm h"
0,952 alcehant erstvend er /
0,953 mit gepvnden fvezen vnt handen /
0,954 da von sich erchanden /
0,955 d' ivden vil vnt gelavpten an dich /
0,956 Nv erbarme dich herre vber mich /
0,957 dise dri toede ligent an mir /
0,958 des gib ich mich shvldik dir /
0,959 ich han mit gedancken /
0,960 den poesen den chrancken /
0,961 mein sel dicke ertoetet /
0,962 vnt svnden vil genoetet /.
0,963 Hilfe mir herre daz ich erste /
0,964 von disem toet als du taet e /
0,965 in dem hovse die magt /
0,966 mir hat mein mvnt den tot beiagt /
0,967 Den andern vor d' porten /
0,968 mit su-tlichen Worten /
0,969 han ich die sel dicke ermort /
0,970 nu chvm h're aller tugent hort .
0,971 erloese mich von den toeden wider /
0,972 in den ich lige von vorchten nid' /
0,973 ze dem dritem mal han ich erslagen /
0,974 die sel min daz mvz ich clagen /
0,975 mit maniger svntlicher tat
0,976 div mir die sel erfvelt hat /
0,977 mit d' svnde sode /
0,978 des ist si in dem toede /
0,979 leider al ze lange gelegen /
0,980 nv rvch mich von dem tode wege- .
0,981 daz ich loblich erste /

0,982 daz ich gesvnde nimmer me . Ame- .
 0,983a hie maht Got plinte- sehen .
 0,983 Ich man dich herre dar vnd'
 0,984 aller deiner wund' /
 0,985 Die dv hie hast getan /
 0,986 machtest manige- plinten man
 0,987 gesehent . Vnt teat ovch da pei /
 0,988 maniges schiechtmes vrei /
 0,989 paidiv man vnt weip /
 0,990 den chrvmphen gaebe dv gerechten leip /
 0,991 Die ovseze- machest dv gesunt
 0,992 die toeren gehoerent d' stvmmen mvnt
 0,993 mahst dv herre sprechent wol
 0,994 des manic herze wart vrevden vol /
 0,995 die behaften dv erlostest /
 0,996 die armen dv trostest /
 0,997 Dv hast getan hie zaichen vil /
 0,998 von den ich nimer sprechen wil
 0,999 want div rede wrd ze lanc
 0,1000 ovch ist mien sin gar ce chranch /
 0,1001 daz ich ez wol den levten /
 0,1002 gar mvege pedeuten /
 0,1003 da von mvz ich ez lazen /
 0,1004 vnt mich d' rede mazen /
 0,1005 Dv hast hie manigen svndaere /
 0,1006 bechert von siner swaere .
 0,1007 daz ist ovch besund'
 0,1008 ainz der grozisten wund' /
 0,1009 Die dv ie begie vnt noch begast /
 0,1010 want dv selbe gesprochen hast /
 0,1011 "aller engel vrevde wirt gemert
 0,1012 so sih ein svnter bechert /"
 0,1013 Nv becher mich herre des pit ich dich /
 0,1014 leg deiner wunder ainz an mih
 0,1015 vnt becher mich gaenzlichen
 0,1016 das in dem himelriche
 0,1017 die engel gevrevt w'den von mir /
 0,1018 vnt erzvnde mein h'ze schier /
 0,1019 mit dinem minnefiw' /
 0,1020 v-t mah mir svnde tiwer . Amen .
 0,1021a hie rait got ze irl-m in die stat a m palmtag .
 0,1021 Ich man dich lieb' herre gvt /
 0,1022 diner grozen diemvet
 0,1023 Daz dv ain esel hast geritten /
 0,1024 mit so gar diemvetigen sitten .
 0,1025 Do dv hoher chaiser riche /
 0,1026 so gar diemvetliche
 0,1027 rite Gegen ierl-m d' stat /

0,1028 svmlich strevten ir wat /
 0,1029 gege- dir ovf den weck zehant /
 0,1030 die and' trvgen in d' hant
 0,1031 von palme- este vnt strevten s dar /
 0,1032 von chinden chom ein michel schar /
 0,1033 mit lob gegen dir ze d' selben vrist .
 0,1034 "gelopt sei d' da chomen ist /
 0,1035 in vnsers herren namen da her
 0,1036 gelopt seist dv immermer"
 0,1037 alsus die schar ivngen /
 0,1038 din lob mit lobe svngen .
 0,1039 vnt sprachen "nv vns saelic schir /
 0,1040 in d' hohe bi dir /
 0,1041 lob vnt ere svezer christ /
 0,1042 si dir gesvngen want du pist /
 0,1043 vns' chvnich vnt wil ovch sin /
 0,1044 ein loser des volckes din ."
 0,1045 Von dem tage trachten si ovf dich /
 0,1046 die ivden vnt besprachen sich /
 0,1047 wie si an gewnnen dir daz leben /
 0,1048 si iahen daz si dir wolten geben /
 0,1049 holtz i- dinem prote /
 0,1050 daz man dich alsus tote /
 0,1051 Ein pischolf ze den ceiten was /
 0,1052 d' was gehaizen cayphas /
 0,1053 d' wissagt daz /
 0,1054 er sprach "ez ist michels paz /
 0,1055 vnt ist nvtzer daz ain man /
 0,1056 als ich iv beschaiden chan /
 0,1057 fvr alle die werlt lied den tot /
 0,1058 denne daz imm' wernde not /
 0,1059 alle div werlt mvese leiden /"
 0,1060 nv hveb sich grozes niden /
 0,1061 von dem ivden gegen dir /
 0,1062 svez' christ nv hilfe ovch mir
 0,1063 so dv herre chvmftic pist /
 0,1064 daz ich dir ze d' selben vrist /
 0,1065 loblich begegen also /
 0,1066 daz ich da von w'de vro /
 0,1067 als dich div chint enphiengen /
 0,1068 div loblich gegen dir giengen / am- .
 0,1069a Da wart got v'raten
 0,1069 Ich man dich herre dv daz geschach /
 0,1070 daz dv chvrzlich dar nach /
 0,1071 wrde v'raten /
 0,1072 we in die daz taten .
 0,1073a da begie got ma-dat
 0,1073 Ich man dich h're sveze /

0,1074 daz du der junger fueze
 0,1075 divmvtlich twenge /
 0,1076 ein tuech vm dich dv trvge .
 0,1077 Da mit du s ze flize /
 0,1078 trvckents daz was weize /
 0,1079 Do dv chom ze petern hin /
 0,1080 er sprach “ich han wol den sin /
 0,1081 daz daz nimmer mag gesin /
 0,1082 daz dv mir twahest die fvze mein /”
 0,1083 “v-t twahe ich nicht die fvze dir /
 0,1084 so gewinnest dv nimm’ taile mit mir /
 0,1085 noch d’hainer slaht phliht /”
 0,1086 “h’re ich spriche die fveze nicht
 0,1087 svnder havpt vnd hende /
 0,1088 daz wasche wis an daz ende /”
 0,1089 Dv sprach dv herre offenbaer /
 0,1090 “ir seit rein vnt doch nicht gar /”
 0,1091 dv chantst in wol an d’ stet /
 0,1092 d’ dich und’ in v’rate- het /
 0,1093 Da von spraech dv “ir seit rein /”
 0,1094 want ivdas was bi in gemain /
 0,1095 Da mit dv h’re saeze /
 0,1096 mit den ivngern dv eze /
 0,1097 mit in begie dv die mandat /
 0,1098 “und’ iv mich einer v’raten hat /”
 0,1099 spraech dv . do fragt ieslicher dich /
 0,1100 “herre maister mainst dv mich /”
 0,1101 “d’ mit mir die hant sin /
 0,1102 pevtet in die schvzel min /”
 0,1103 “maister” sprach z ivdas “pin ich z d’ /
 0,1104 d’ dich verriet od’ wer /”
 0,1105 “ia dv hast ez erraten /
 0,1106 nv shvel wir mandaten /”
 0,1107 Dv segent ob de- tische daz prot /
 0,1108 daz in dein hant gvetlichen pot /
 0,1109 “nemt hin ditz ist mein lichnam /”
 0,1110 div spise den dein wol gezam /
 0,1111 da mit segent dv den wein /
 0,1112 “hie pi shvlt ir gehvgende min /”
 0,1113 spraech dv “nv trinchet mein plvet /
 0,1114 als oft als ir daz tvt /
 0,1115 so gehuget mein da pi /
 0,1116 daz ich iwer loser sei .”
 0,1117 Ivda pot dv ein snite- /
 0,1118 die az er gar vnv’mitten /
 0,1119 mit der fver der tivel in in /
 0,1120 dv wart vercheret al sein sin /
 0,1121 Do gie er dannen alzehant /

0,1122 vnt cho- da er die ivden vant /
0,1123 er sprach “was welt ir geben mir /
0,1124 ich antwrt iv gevangen schier /
0,1125 Iesum” des waren die ivde- vro /
0,1126 sus chomen si ze gedinge do /
0,1127 vm driezic phenninge verchovft er dich svezer christ /
0,1128 owe was noch ivdas ist
0,1129 Die diene- liechnamen vnt din plvet /
0,1130 v’chavfent dicke vm mi-ner gvet /
0,1131 Genade herre erbarme dich /
0,1132 genaedilichen vb’ mich /
0,1133 ob ih dich ie v’chauft hab /
0,1134 des la mich hie chomen ab /
0,1135 daz ez mir hin nicht werd gespart /
0,1136 want ich mich nie han bewart /
0,1137 gar rain an miner gewizzen /
0,1138 ih han mich ie geflizen /
0,1139 daz ich d’ werlt diener waere .
0,1140 Unt han dich dicke als ivdas /
0,1141 v’chauft an den christen /
0,1142 mit poesen hind’listen /
0,1143 Vnt nam also dinen lichnam /
0,1144 da von mir nie wol gezam /
0,1145 div gotlichiv spise /
0,1146 da von pin ich unwise /
0,1147 worden h’re gvt /
0,1148 an dir an dine- plvt /
0,1149 pin ich worden schveldic
0,1150 herre wis gedvltic /
0,1151 gege- mir vil armem svntaer /
0,1152 vnt ring mir meiner gewizzen swaer .
0,1153a Da tet got sein not chvnt
0,1153 Ich man dich h’re do dir chom div cit /
0,1154 als vns div schrift vrchvnde git /
0,1155 Daz dv die marter soldest /
0,1156 leiden als dv woldest /
0,1157 Do gie dv mit den ivng’n dien /
0,1158 in ein garten want ez solt sien /
0,1159 dv sagest in al din not /
0,1160 “mein sel ist trovric vntz in d- tot .
0,1161 seit hie vnt waht mit mir /
0,1162 ir w’t alle flvtic schier ./
0,1163 Vnt beginnet von mir fliehen /
0,1164 so ir mich hin seht ziehen /”
0,1165 Dv sprach sant peter zehant /
0,1166 “ich tven dir mein willen bechant /
0,1167 des ich nimm’ wil ab gesten /
0,1168 ich pin bereit / mit dir ce gen /

0,1169 in charch' vnd i- den tot /
0,1170 des wendet mich dehain not /
0,1171 ob in allen div fluht geschicht /
0,1172 ich flevhe benamen von dir nicht ."
0,1173 Do spraech dv svzer ih-u christ clar /
0,1174 "peter ih sag dir fur war /
0,1175 Daz solt dv glauben mir
0,1176 e heint d' han chraet zwir /
0,1177 dv hast dri stunt v'lavgent mien /"
0,1178 "h're des mag nicht sein /
0,1179 ich wil e liden de- tot /
0,1180 mit dir vnt d' mart' not /
0,1181 ich v'lavgen din niht /
0,1182 swaz halt anders mir geschit ."
0,1183 Do spraech dv h're zv in /
0,1184 "nv wacht vnt pittet ich wil da hin"
0,1185 Dv gie ein lvtzel dan
0,1186 vnt hvb daz erste gepet wid' an .
0,1187 "Vater min von himelrich /
0,1188 ich pitte dich vnt sei ez pettlich /
0,1189 daz ich vf d' erde /
0,1190 d' mart' vb' werde .
0,1191 doch erge d' wille din /
0,1192 h're vater vnt nicht d' min /"
0,1193 Do gie dv an den stvnden /
0,1194 da dv die ivnger fvnde /
0,1195 die sliefen alle do spraech dv /
0,1196 "Symon slefste dv nv /
0,1197 mochst dv nicht eine weile mit mir /
0,1198 wachen sih er chvmt schir /
0,1199 er wachet niht d' mein leben /
0,1200 hat in d' svndaer hende geben /
0,1201 nv pittet vnt waht /
0,1202 daz ich nicht w'de v'swacht /"
0,1203 Dv gie aber pitten me /
0,1204 vnt spraech daz erste gepet als e /
0,1205 dv gie dv zv den ivngern wid' /
0,1206 die lagen ab' i m slaf nider /
0,1207 ir ovgen waren betrvbet /
0,1208 vnt siv vf sorgen vbet /
0,1209 Do gie dv sa ze d' dritten stvnt /
0,1210 mit gestrackter venie vns tvt chvnt /
0,1211 div schrift daz dv an d' stet /
0,1212 lenger spraech din gepet /
0,1213 Do wart din angest also groz /
0,1214 daz plvtic swaiz von dir floz .
0,1215 Daz din svzer lip clar /
0,1216 mit plvet was zeflozen gar /

0,1217 daz div erde dvrch din gewant /
 0,1218 wart wol fevtich zehant .
 0,1219 Der grozen angest man ich dich /
 0,1220 nv pitte ich herre daz dv mich /
 0,1221 behvetest vor angestlich' not /
 0,1222 daz ich nimmer wernden tot /
 0,1223 iht v'dine in disem leben /
 0,1224 vnt gervch mir andaht geben /
 0,1225 ze minem gebet svezer christ /
 0,1226 dvrch daz gepet daz dv ze d' vrist /
 0,1227 mit plvtigem swaiz teat /
 0,1228 vnt mach mich so staet /
 0,1229 daz ich nimmer mere /
 0,1230 gewenck von din' lere . Amen .
 0,1231a Da ward got v'chouft
 0,1231 Ich man dich dv man dih v'riet /
 0,1232 wie man den ivden vm dich beschiet .
 0,1233 Ivdas sprach zv den ivden "nv nemt war /
 0,1234 den ich da chvsse an d' schar /
 0,1235 den schvlt ir vahlen daz ist er /
 0,1236 Vnt hapt in vast vnt dennoch mer
 0,1237 fvert in gew'liche /
 0,1238 daz er iv niht entweiche ."
 0,1239 Dv besampten die ivden sich /
 0,1240 als si wolten vahe- dich /
 0,1241 daz geschach ze mitternacht /
 0,1242 do het dv daz gepet volpracht /
 0,1243 Dv gie dv lieber h're mein /
 0,1244 wid' zv den ivng'n din /
 0,1245 die sliefen ab' do spraech dv /
 0,1246 "nv slaft vnt rvwet nv /
 0,1247 er nahent d' mich v'rate- hat
 0,1248 nv stet uf vnt ge wir daz ist min rat ."
 0,1249 An dem wort chom ivdas /
 0,1250 [...] [...]
 0,1251 vnt mit im ein menige groz /
 0,1252 mit stecken vnt mit fevsten ploz /
 0,1253 Ivdas do nicht sovmt sich /
 0,1254 er gie zv dir vnt grvzt dich
 0,1255 sein gaist was vngesvezet /
 0,1256 "maist' wis gegrvezet /"
 0,1257 sus sprach er han ich v'nomen /
 0,1258 "vrevnt war umbe pist dv chomen /
 0,1259 geist dv des menschen svn hin /
 0,1260 mit chvssen daz ist nicht sin /"
 0,1261 also spraech dv herre gvt /
 0,1262 erstainet was d' ivden mvvet /
 0,1263 Do fragten s ze d' selben vrist /

0,1264 “wa ist nv iesel Christ /”
 0,1265 Do spræch dv sveze “daz pin ich”
 0,1266 zehant vielen si hinder sich
 0,1267 vf die erden ver tote algelich /
 0,1268 Do spræch dv ab’ gar minnechlich /
 0,1269 “ich sagt iu z e daz ich ez pin /
 0,1270 ob ir mih svchet so lat hin
 0,1271 dise ivnger mit fride gan /”
 0,1272 peter daz sw’t fvren began /
 0,1273 vnt slvg des f’sten chnete /
 0,1274 sin or ab daz rehte /
 0,1275 Do spræch dv “stoz in din sw’t /
 0,1276 waist dv nicht het ich gegert /
 0,1277 ze meinem vater er het mir gesant /
 0,1278 vil engel die daz heten erwant /”
 0,1279 Dv hailest im daz ore wid’ an /
 0,1280 sam ez wunde- nie gewan /
 0,1281 dv gaben die iv-g’ alle die flvht /
 0,1282 vnt die ivden erzaigten ir vnzvht /
 0,1283 an dir an den stvnden /
 0,1284 die hent si dir pvnden .
 0,1285 Vnt fvrten dich gevangen /
 0,1286 mit schalle gegen d’ schranken .
 0,1287 Peter volget dir v’re nach /
 0,1288 vntz er rechte besach /
 0,1289 was si mit dir taten /
 0,1290 die dich gevangen haben
 0,1291 Nv man ich herre din’ vancnvst dich /
 0,1292 daz dv mir helfest herre swa ich /
 0,1293 in tivels vancnvsse sei /
 0,1294 daz ich da von schir w’de vrei /
 0,1295 od swa mich dew werlt bevangen hab /
 0,1296 da geruch ovch mir helfen ab /
 0,1297 oder min lip pose /
 0,1298 da von mich h’re lose /
 0,1299 dvrch die vancnvsse din /
 0,1300 vnt hilfe mir daz ich mvz sin/|
 0,1301 meines leibes maister wol /
 0,1302 vnt mach mich deiner minne vol .
 0,1303 daz ich dir nicht entrinne /
 0,1304 v-t pint mich mit deiner mi-ne . Ame- .
 0,1305a hie sagt Nichodemus wie got wart gem<t
 0,1305 Aller erste wil ich tichten /
 0,1306 vnt die lev’t berichten /
 0,1307 von diner marter svezer christ /
 0,1308 wie ez allez dort ergangen ist /
 0,1309 also schreipt vns nichodemus /
 0,1310 der berichtet vns da von sus /

0,1311 wie ez alles ergie vnt wie ez geschach /
0,1312 want er ez allez horte vnt sach /
0,1313 Da von chvnd er z gesagen /
0,1314 ab ich mvz min maister chlagen /
0,1315 daz ich dem so frv entran /
0,1316 ob ich ez nith wol berichten chan
0,1317 Als ez d' materie zimt
0,1318 min gut wille ez mir nicht benimt /
0,1319 benem mir z nicht min vnchvnt /
0,1320 da bedarf ich gveter levte gvnst .
0,1321 daz ir mir got helfet pitten /
0,1322 daz er mit vaeterlichen sitten /
0,1323 mir die sinne also berichte /
0,1324 daz ich ez also getichte /
0,1325 daz er da vo- geeret sei /
0,1326 vnt ich pleibe gespotes vrei . Amen .
0,1327 Der romaer wurde hie bevor /
0,1328 so hohe swept mit wird enpor /
0,1329 daz in was lvtzel iemen wid' /
0,1330 paidiv ovf vnt nider .
0,1331 Die fvrsten namen ir rechte al da /
0,1332 ze irl-m vnt anderswa
0,1333 in manigen landen wieten /
0,1334 nv was pei ih-u christi ceiten .
0,1335 Ein chvnich ze galilea /
0,1336 dem die fuersten warten alle da .
0,1337 D' was herodes genant /
0,1338 d' het levte v-t lant /
0,1339 vnd scepter vnt chrone
0,1340 von roemischem chaiser schone
0,1341 Dem mves er vnd'taenick wesen /
0,1342 als ich ez an d' schrift han gelesen /
0,1343 Dv was pilatus pi d' ceit /
0,1344 riht' vnt het des streit /
0,1345 daz er z gerichte nicht wolde han /
0,1346 von herode vnt den pan
0,1347 Dv fvr er gegen rome dan /
0,1348 von dem chaiser er z gewan /
0,1349 Herodes was vmbe daz /
0,1350 pilato veint vnt gehaz /
0,1351 d' haz w't lange und' in /
0,1352 daz ir itwederz sin /
0,1353 dem anderm was gevaere /
0,1354 ditze bechant maere .
0,1355 tvv vns vm ir veintschaft chvnt /
0,1356 div w't so lange vntz an die stunt .
0,1357 Daz gevangen wart iesus /
0,1358 den sande do pilatus /

0,1359 herode do wrden si gar /
 0,1360 versvnet nv nemt war /
 0,1361 Swer noch hivte veintschaft hat /
 0,1362 vnt gotes lichnamen dar vm lat /
 0,1363 d' ist poeser svnd' wan /
 0,1364 dan dise poese zwene man /
 0,1365 die wrden v'svnet cehande /
 0,1366 dv in einer dem and'm sande /
 0,1367 nv leg wir die rede nid' /
 0,1368 vnt griffen an die materi wid' /
 0,1369 Wie ez vmb christes marter ergie /
 0,1370 daz wil ich iv chvnden hie .
 0,1371 Die rechten warhait ich ew sage /
 0,1372 nah christes marter am vierde- tage /
 0,1373 dv sagt allererste nichodemus /
 0,1374 wie gemartert wart iesus /
 0,1375 Vnt hiez daz schreiben ebrayschen an /
 0,1376 da von wir z in latin han /
 0,1377 von d' latin han ich ez praht /
 0,1378 ze tiusche in die andaht /
 0,1379 daz got da von w'de
 0,1380 gelopt vf d' erde .
 0,1381 Ez ist geschehen ze ware /
 0,1382 an dem nevnzehente- iare /
 0,1383 pi romischem chaiser tiberio /
 0,1384 vnt an dem nevncehentem iare do .
 0,1385 herodes het daz chvnchrich /
 0,1386 ze galilea gwaltichlich /
 0,1387 Vnt dv pilatus richtaer was /
 0,1388 vnt johannes vnt cayphas /
 0,1389 d' fursten priester waren /
 0,1390 ze irl-m pei den iaren /
 0,1391 Als vns div schrift vrchvnd geit /
 0,1392 in des abrvllen zeit /
 0,1393 des manoed am ahtem tage /
 0,1394 do geschach ditz als ich iv sage /
 0,1395 daz iesus wart gevangen /
 0,1396 do chomen die Iuden gegangen /
 0,1397 zv pylato dem rihtaere /
 0,1398 vnt sagten im div maere /
 0,1399 Vm woe si in heten pracht dar /
 0,1400 si sprachen "pylato nv nim war /
 0,1401 was wir hin ze im ze sprechen han
 0,1402 er hat sich des ouz getan .
 0,1403 Er sei chvnich da mit er
 0,1404 hat gewacht den chaiser her /
 0,1405 vnt giht ovch da pei /
 0,1406 daz er gotes svn sei /

0,1407 sw' daz tvt daz hab wir wol /
 0,1408 daz man den dar vm toeten shol /
 0,1409 dar zv pricht er vnser e /
 0,1410 vnt tvt dennoch me /
 0,1411 den samztage er zeprochen hat
 0,1412 daz lebn er pilleichen dar vmbe lat /
 0,1413 er chan sich mit zovb'listen /
 0,1414 vnt mit zaichen fristen /
 0,1415 die ovsezen macht er gesvnt /
 0,1416 vnt enslevzet d' stvmmen mvnt /
 0,1417 die plinten macht er gesehent /
 0,1418 da von si im hailichait iehent ."
 0,1419 An disen dingen rvegte- si in /
 0,1420 dv sande pilatus da hin /
 0,1421 sein levfel ein stolzen chnabe-
 0,1422 d' sich wol chvnde an tvgende- haben .
 0,1423 Er trveg tvech reine wize /
 0,1424 vmb sinen hals mit fleyze /
 0,1425 als man noch enhalb meres phleget /
 0,1426 ieslicher sich d' chost beweget /
 0,1427 al dar nach vnt er ist gestalt /
 0,1428 er si ivnch oder alt .
 0,1429 Dar nach vnd er daz tvech trait /
 0,1430 do gie d' chnap gemait /
 0,1431 da er den svezen ih-m vant /
 0,1432 vnt prait daz tvch vnder in cehant /
 0,1433 fvr in vf die erden /
 0,1434 vnt hiez dar vf den w'den /
 0,1435 gen in die schrangen w'dechlichen /
 0,1436 den hohen chvnich reichen /
 0,1437 Do daz die ivde- sahen /
 0,1438 si begvnden in harte v'smahen /
 0,1439 daz er so erberlich solde gen /
 0,1440 si begvnden pilatum besten /
 0,1441 mit grozem chradem dar vmbe /
 0,1442 "war vm hat der tvmben /
 0,1443 disen so schone her in pracht /
 0,1444 wes ist da mit gedaht
 0,1445 er solt mit schergen stimme /
 0,1446 praht sin vnt mit grimme"
 0,1447 sprache- die ivden "daz waer recht /"
 0,1448 Pilatus fragt do den chneht
 0,1449 "war umbe hast dv daz getan /
 0,1450 daz solt dv mich wizzen lan /"
 0,1451 Dv sprach er herre daz tvn ich /
 0,1452 dv sandest ze alexanders mih /
 0,1453 ze irl-m sah ich daz /
 0,1454 daz er vf ainem esel saz /

0,1455 vnt rait in die stat alsus /
 0,1456 dirre hohe herre iesus /
 0,1457 die ebraischen chint alle dar /
 0,1458 chomen al vnt name- sein war /
 0,1459 gegem im si lobeleich giengen /
 0,1460 mit gesang si in enphiengen /
 0,1461 si trvge- plvemen vnt este /
 0,1462 von olpaum allerpeste /
 0,1463 vnt strevnten s vnd' in zehant /
 0,1464 vnt dar zv ir gewant /
 0,1465 vnt svngen in loblich' wis /
 0,1466 "osanna in excelsis."
 0,1467 des chvnd ich mich nicht v'stan /
 0,1468 wand ich pin ein haindnischer man /
 0,1469 dv pat ich si ez ze bedevten mir /
 0,1470 "tv vns saelich pi dir /
 0,1471 in d' hohe" sprichet daz /
 0,1472 da von het ich in gern paz .
 0,1473 Vnt schoner gewiset /
 0,1474 ich devht mich z gepreiset /
 0,1475 mocht ich ez paz haben getan /
 0,1476 alsus sprach d' hofsche man .
 0,1477 Do pilatus daz erhorte /
 0,1478 ein tail er von dem worte /.
 0,1479 erschract do er im s v'iach /
 0,1480 zv im er gvetlichen sprach /
 0,1481 "nv wies in mit dir hin wid' fvr /
 0,1482 vnd nach diner willechur /
 0,1483 vnt dv in wis h' wid' in /
 0,1484 als dich lere dines hercen sin /"
 0,1485 Des was d' chnap gemait /
 0,1486 er was des dienstes im berait /
 0,1487 er weist in schoner nv denne eet;
 0,1488 daz tet de- ivden von h'cen we /
 0,1489 Daz tvech er vnd' in prait
 0,1490 dar vf er in in lait .
 0,1491 als er da vor het getan
 0,1492 dv nigen div chrivce vnt die man /
 0,1493 Die d' chrivce phlagen
 0,1494 do begvnden die ivden page- .
 0,1495 daz si nigen gegen christ /
 0,1496 "ditz sint zovb'liste /"
 0,1497 sprachen die ivden gegen in /
 0,1498 doch heten si genigen im da hin .
 0,1499 dem svezem iesu ze eren /
 0,1500 do begvnden sich meren .
 0,1501 d' ivden haz vnt ir geschrai /
 0,1502 "owe heya vn hay

0,1503 pilatus z wiv gestatest dv des /”
0,1504 er sprach “ir herren nv sagt mir wes”
0,1505 “Daz ditz vmpild hie geschit /
0,1506 daz man dise nigen siht .
0,1507 gegen iesu dem trvгнаere /
0,1508 la dir ez swaere wesen /
0,1509 Ob dv hast mit dem chaiser phliht /”
0,1510 pilatus sprach “lobt ir des niht /
0,1511 daz div nigent gegen im /
0,1512 dar an ich iuern haz v’nim /
0,1513 ew solten div zaichen /
0,1514 pillichen ew’ herce erwaichen /”
0,1515 Da mit chaert en sich dannen /
0,1516 vnt redt mit den mannen .
0,1517 die d’ chrivce phlegten /
0,1518 war vmb si sich wegten /
0,1519 Vnt in div haupt so nider sigen /
0,1520 daz si iesu ze eren nigen .
0,1521 Si sprache- “daz ist ain wnder /
0,1522 ir wizet wol besvnder /
0,1523 daz wir sein haiden alle drei /
0,1524 vnt sein d’ gewizen vri /
0,1525 daz wir iesum nicht peten an /
0,1526 ez ist an vnsern danck getan .
0,1527 wir mochten vns nicht habe- wid’ /
0,1528 div chrivce vns mit in zvgen nid’ /
0,1529 daz wir mvsten nigen dar /”
0,1530 dv wrden die ivden betrvеbet gar /
0,1531 pilatus von dem worte /
0,1532 erschricte dv er daz horte /
0,1533 Do giengen si ovz d’ schrangен dan /
0,1534 vnt erwelten zwelf ebraisch man /
0,1535 di sterchisten die si hatten
0,1536 si pvtten vnt paten /
0,1537 daz si d’ chrivce also phlaegen /
0,1538 daz si dar vmbe ith wrden vnvro /
0,1539 si sprache- “daz gelavbet /
0,1540 man sleht iv ab dew havbet /
0,1541 ob ir iu indert naiget /
0,1542 vnt im dehain er erzaiget /”
0,1543 Des ieslichem chriuce viere /
0,1544 wrden gestalt schiere /
0,1545 die ir phlegen solden /
0,1546 dar an si ervinden wolden /
0,1547 was an disen dingen waere war .
0,1548 Nv hiezen si iesum aber dar /
0,1549 ze de- drittem mal in weisen /
0,1550 d’ chnap ist wol ze preisen /

0,1551 daz er shone mit im gie /
 0,1552 dvrch dehain vorchet er daz lie /
 0,1553 er weist in shone als e hin
 0,1554 do begunden aber wid' in .
 0,1555 Dev chrivce vnt die zwelf man /
 0,1556 nigen als ie ene heten getan /
 0,1557 shone alle geliche /
 0,1558 dem chvnige / von himelriche .
 0,1559 Der da tet groze divmvet schein /
 0,1560 er gie dar als aim laemplein /
 0,1561 daz man da fvert zv d' flaischpanch /
 0,1562 pylatus von dem stvele spranch
 0,1563 erschracht von disen dinge- /
 0,1564 dv sah man in dringen /
 0,1565 ein potten d' warf mit sinnen /
 0,1566 von pilato d' wirtinnen /
 0,1567 was d' pote dar gesant /
 0,1568 div was procula genant /
 0,1569 d' pote sprach zv pilato /
 0,1570 "ir enpeutet dein hovsfrovwe also /
 0,1571 "dv solt dich dehain gerith an /
 0,1572 neme- vm disen rechten man .
 0,1573 Ich han heint in iamers sitten
 0,1574 groze- vngemach erlitten /
 0,1575 in dem trovvn von im /
 0,1576 da von dih von d' rede nim /"
 0,1577 Dv schriren die ivden alle /
 0,1578 mit vngefvegem schalle /
 0,1579 "daz hat er ab' mit zauber getan /
 0,1580 daz ir getrovmet ist da von /
 0,1581 ez ist von zavber chomen /"
 0,1582 pilatus sprach "hast dv v'nomen /
 0,1583 was dise gegen dir sprechent /
 0,1584 ich en waiz was si an dir rehent /
 0,1585 Ir chlage ist gegen dir mancvalt /"
 0,1586 "ain ieslich man hat wol gewalt /
 0,1587 ze sprechen vbel vnt gvt /
 0,1588 da sehe er zv d' daz tvv /"
 0,1589 alsus antwrt im christ /
 0,1590 gedvltichlichen ze d' vrist
 0,1591 "was" sprachen die ivden do /
 0,1592 "wir wizen wol daz dem ist so .
 0,1593 Daz dv von vne pist geborn"
 0,1594 daz was svmelichen vnd' in zorn .
 0,1595 "Vm die vnschvldigen chint /
 0,1596 div dvrch dich elliv erslagen sint /
 0,1597 Von dir div geschit geschach /
 0,1598 dar vmb ma- fliehen sach /

0,1599 den vater vnt die mveter dein /
0,1600 in egipte dar an wart schein /
0,1601 daz si hie nicht mochten wesen /
0,1602 noh pei ir volck wolden genese- .”
0,1603 Daz was genugen und’ in lait /
0,1604 d’ ivden vnt sprachen mit semftichait /
0,1605 er ne wer geborn von vne /
0,1606 ez tet svmlichen vnd’ in we .
0,1607 da si so vnbeschaidenlichen /
0,1608 gegen im schriren alle geliche /
0,1609 Dv pilatus siv nicht mochte /
0,1610 pezern als ez im tochte /
0,1611 daz si ez hete- lazen /
0,1612 si wolden si z nicht mazen /
0,1613 Er sprach ze iesu “was tven ich gegen dir /”
0,1614 “daz dir enpholhe- ist gegen mir /”
0,1615 sprach iesus aber gedultichliche /
0,1616 der hoh’ chvnich von himelriche
0,1617 “Moyses vnt die propheten /
0,1618 lange vor heten /
0,1619 gesprochen von d’ marter mein /
0,1620 da von sol ez also sein /
0,1621 Vnt von meiner vrstende /”
0,1622 “nv hoere die missewende /”
0,1623 sprachen die ivden an d’ stat /
0,1624 “war selbe v’iehen hat /
0,1625 was bedvrf wir gezevge me .
0,1626 dv solt vns richten nach d’ e .”
0,1627 vil d’ ivden waiten /
0,1628 dar mit si wol beschainten /
0,1629 daz in dar an nicht lieb geschach /
0,1630 dv daz wainnen geschach /
0,1631 der richter pilatus /
0,1632 er vnt Nichodemus .
0,1633 Versvehten ir chv-st vnd ir list /
0,1634 ob si mochten iesum christ /
0,1635 mit dehainen dingen /
0,1636 von den ivden pringen /
0,1637 Die alten daz widersprachen /
0,1638 die ir haz an im rachen /
0,1639 do stvend ainer ovf vnt sprach /
0,1640 “siechen man mich ligen sach /
0,1641 aht vnt drizik iar /
0,1642 do macht mich gesvnt gar .
0,1643 Iesus da ich lag erlamt /”
0,1644 also taten die and’n alsamt
0,1645 Die er gemachet het gesvnt /
0,1646 die stvenden ovf an d’ stvnt

0,1647 Vnt sagten dem richtaere /
 0,1648 div bechanten maere /
 0,1649 waz er genaden het getan /
 0,1650 an vil manigem siechem man /
 0,1651 vnt taten im ovch daz chu-t
 0,1652 daz lazarus von im erstvent
 0,1653 d' vntz an den vierden tak
 0,1654 toter in dem grabe lak .
 0,1655 D' goetlichen ere /
 0,1656 erschrachte pilatus vil sere /
 0,1657 Vnt wolt in haben lazen /
 0,1658 do schrire- si lovt vnmazen /
 0,1659 die ivden vnt erzaigten ir haz /
 0,1660 "benamen vnt tuest dv daz /
 0,1661 so wiz wir wol daz dv niht pist /
 0,1662 des chaisers vrvnt vnd laest dv christ /"
 0,1663 Das was plato vil swaere /
 0,1664 vnt wart de- ivden gevaere /
 0,1665 Er sprach "ir wart stritick ie /
 0,1666 wid' got d' ivch hie /
 0,1667 mit gewaltig' ha-t /
 0,1668 fvt ovz egiptenlant /
 0,1669 vnt almitten dvrch daz mer .
 0,1670 vnt trancten pharaonis her /
 0,1671 durch iwern willen daz gesach /
 0,1672 wid' in man iv ie strebe- sach
 0,1673 Er gab iv in h'reme /
 0,1674 daz wazzer ovz dem stain do /
 0,1675 Vnt regent iv himelprot her nid' /
 0,1676 dennoch wart ir im wid' /
 0,1677 ewer triwe was ie gegen im lam /
 0,1678 vnt wart ovch vnghehorsam /
 0,1679 ewerm maister moysi /
 0,1680 sus was ew ie valscheit bi /
 0,1681 ir ampel fvr got ain chalp /
 0,1682 alsus trivgt iv d' alp /
 0,1683 ir wart ie aller vntriwe +e vntriwe: Jaksche ändert in @E vri /
 0,1684 da geht ir daz ich si /
 0,1685 des chais's veint ob ich hie /
 0,1686 Iesum laz den ir nie /
 0,1687 mit redlichen sachen
 0,1688 schvldik mocht gemachen /"
 0,1689 da mit er vz d' schranken
 0,1690 mit zorn wolt sein gegangen /
 0,1691 daz was den ivden vngemach
 0,1692 si schriren im lovt hin nach /
 0,1693 "Nv richt vns dvrch die guete din
 0,1694 want gotes svn ergiht sich sin

0,1695 vnt giht daz er chvnik sei /
 0,1696 dar vmbe daz im die chvnige dri
 0,1697 ir opfer prachten vmbe daz
 0,1698 wrden div chint ovf sin haz /
 0,1699 Von herode erslagen /"
 0,1700 do begynd pilatus dagen /
 0,1701 vnt erchom da von ein tail /
 0,1702 er sprach "sagt mir dvrch iwer hail /
 0,1703 ist er z den herodes da /
 0,1704 svechte" si sprachen "ia /"
 0,1705 Dv saz er an z geriht nid' /
 0,1706 do chomen si alle fvr in wid' /
 0,1707 vnt chlagten vb' in als e /
 0,1708 vnt machten s michels me .
 0,1709 dan si da vor taten /
 0,1710 vaste si in vm traten /
 0,1711 pilatus fragt vrtail vber in /
 0,1712 die ivden sprachen "nv fvr in hin /
 0,1713 vnt chrevtz in er ist des toedes w't /"
 0,1714 "nv tvt im selbe des ir gert /
 0,1715 Nemt in vnt riht nach ew' e /
 0,1716 als es an ewerm orden ste /"
 0,1717 also sprach der rihtaer /
 0,1718 daz was den ivde- swaer /
 0,1719 Si sprachen "daz en zimt vns nicht /
 0,1720 vnser e vns des nicht giht /
 0,1721 daz wir iemen shvlen toeten /
 0,1722 dv solt vns ovch nicht noeten /"
 0,1723 Dv slvegen si ze d' selben vrist /
 0,1724 vf sein hals den vil svezen christ
 0,1725 vnt bespeiten in gar /
 0,1726 sin wennechlich antlvitz clar /
 0,1727 daz al engel gerent an ze sehen /
 0,1728 de- ist da smaechlichen geschehe-
 0,1729 sein schone gar bedeckt hat
 0,1730 maniger spaichel vnflat .
 0,1731 Nu was herodes in den tagen
 0,1732 in der stat daz hort ich sagen /
 0,1733 pilatus dv hveb er sih dan /
 0,1734 vnt lait iesu ain purper an /
 0,1735 vnt sand in herode hin /
 0,1736 er sach groezlich gern in /
 0,1737 vnt was sein inrrchlichen vro /
 0,1738 vnt wart sein vrevnt dar vmbe do /
 0,1739 daz er in im het gesant /
 0,1740 herodes was chvnick vber daz lant /
 0,1741 Do was pilatus rihtaer da /
 0,1742 in d' stat vnt niht and'swa .

0,1743 Herodes zaichen wolt han gesehen /
 0,1744 vo- iesv des mocht nicht geshehen /
 0,1745 want er nie wort zv im gesprach /
 0,1746 daz was herode vngemach /
 0,1747 In dovhte er het sin vn ere /
 0,1748 daz er in v'smaehet so sere /
 0,1749 er lait im an ein wiz gewant /
 0,1750 vnt wart pilato wid' gesant .
 0,1751 An daz gerichte er av' saz /
 0,1752 vnt sprach zu ih-v "nv sag mir daz /
 0,1753 ob dv d' ivde- chvenick pist /"
 0,1754 do antwrt im iesus an d' vrist /
 0,1755 "spriechest dv selb von dir selbe- gegen mir /
 0,1756 oder hat z iem- gesagt dir /"
 0,1757 "nv pin ich doch ein ivd nicht /"
 0,1758 sprach pilatus "dein volck sein giht"
 0,1759 Do sprach do iesus gedvltliche /
 0,1760 "ez en ist hie niht min reiche /
 0,1761 in dirre werlt wer ab ez hie /
 0,1762 so het ovch ich wol lev't hie /
 0,1763 die mich von de- ivden nerten /
 0,1764 vnt ir gewaltes erw'ten /
 0,1765 dester groz' ist sin mistat /
 0,1766 d' mich dir geantwrt hat /"
 0,1767 sprach pilatus "des nim war /
 0,1768 din volck dein fvrsten gar /
 0,1769 Dich prachten mir gevangen /
 0,1770 was hast dv begangen /
 0,1771 des solt dv mich nicht v'dagen /"
 0,1772 iesus sprach "ich wil dir sagen
 0,1773 Ich pin dar vmbe her chomen /
 0,1774 daz div warheit w'd v'nomen /
 0,1775 Der warhait ich ein gezevg pin /"
 0,1776 do sprach pilatus wid' in /
 0,1777 "waz ist div warhait /
 0,1778 daz hort ich ob mir daz wrd gesait"
 0,1779 Da mit gie er von im zehant /
 0,1780 da er die ivden stente vant /
 0,1781 zv den sprach er gar swinde /
 0,1782 "dehain sah ich an im vinde .
 0,1783 Dar vmb er leiden sol den tot /
 0,1784 vnt dehainer marter not /
 0,1785 ich haiz in zvchtigen wol /
 0,1786 da mit ma- in lazen sol ."
 0,1787 Do sprachen die ivden alle gelich /
 0,1788 "dv solt in toeten piterlich .
 0,1789 Nv chrivze in nv chrivze in /
 0,1790 daz wirt vo- chaiser dein gewin ."

0,1791 "nv waz er vbels hat getan /
 0,1792 daz shvlt ir mich wizen lan ."
 0,1793 "Dv sold daz wizzen daz wir /
 0,1794 in nicht heten geantwrt dir /
 0,1795 vnt wer er nicht ain vmpilliech man ."
 0,1796 do gie pilatus wid' dan /
 0,1797 vnt sprach zv ih-v /
 0,1798 "von wan pist dv"
 0,1799 Iesus gab im ein antwrt niht /
 0,1800 des lasters nam pilatus phlicht .
 0,1801 Er sprach "redst dv niht mit mir /
 0,1802 daz ist wund'lich an dir /.
 0,1803 vnt waist dv nicht daz ich /
 0,1804 han wol gewalt ce laze- dich /
 0,1805 vnt ovch ze toeten ob ih wil /"
 0,1806 d' red was im gar zevil .
 0,1807 Iesus gedvltichlichen sprach /
 0,1808 want er sich mit worte- niht rach /
 0,1809 sein tvgent div was manicvalt /
 0,1810 er sprach "dv hetest dehain gewalt /
 0,1811 vb' mih noch ub' mein leben /
 0,1812 want als vil als dir ist geben .
 0,1813 Da von ich dir chvnde /
 0,1814 dester groezer svnde /
 0,1815 die mich dir gevangen haben pracht /
 0,1816 we in daz ir ie wart gedacht /"
 0,1817 Die ivden vz der schranken /
 0,1818 waren do gegangen /
 0,1819 daz si iht wrde- gemeilet /
 0,1820 so iesv wrde v'taillet /
 0,1821 Si dovht in w' ubel geschehen /
 0,1822 oh si in solten an sehen .
 0,1823 ez ist noch manges mannes sit /
 0,1824 daz er sich rainen wil da mit /
 0,1825 daz er daz vngern an siht
 0,1826 swa vber iemens leben vrteil geschit /
 0,1827 Peter chom gegange- hin nach /
 0,1828 vf daz ende er geren sach /
 0,1829 wie ez vmb iesum solt ergen /
 0,1830 zv dem fiwer er begvnde sten /
 0,1831 Want ez was vnmazen chalt /
 0,1832 do chom gega-gen ein dirn palt /
 0,1833 al si petern ansach /
 0,1834 zv im si paltlichen sprach /
 0,1835 "Dv pist ovch von galilee /
 0,1836 iesus ivnger man het dich e /
 0,1837 dicke pi im gesehen /"
 0,1838 peter wolt ir des niht v'iehen .

0,1839 Vnt v'lavgent sein cehant
 0,1840 vnt swr er hiet in nie erchant /
 0,1841 alsus lavgent er mit eiden /
 0,1842 drei stvnt vmbescheide- .
 0,1843 Do sach iesus petern an /
 0,1844 do gie er ovz wainen er began /
 0,1845 wan er gedacht wol dar nach /
 0,1846 daz iesus vor zv im sprach /
 0,1847 "e den d' han chraet zwir /
 0,1848 heint daz gelavbe mir /
 0,1849 dv hast dri stv-t v'lavgent mein /"
 0,1850 daz was sines hercen pin .
 0,1851 Pylatus zv den ivden gie /
 0,1852 sin rede er wislich an vie /
 0,1853 er sprach "was tvn ich ih-v christ /
 0,1854 d' ewer herre chvnick ist /"
 0,1855 die jivden sprachen offenbaer /
 0,1856 "wir haben dehainen chvnik fvr war /
 0,1857 wan ein chaiser habe- wir /"
 0,1858 pilatus sprach "nv sagt mir /
 0,1859 sol ich iv einen lazen /
 0,1860 d' iv chvmpt ze mazen /
 0,1861 ze ivren ostern daz sei iesus /"
 0,1862 die ivden sprachen "nicht alsus .
 0,1863 hahe in vnt laz vns barraba- /
 0,1864 so hast dv vnsern willen getan ."
 0,1865 Da schaein ir neit want barrabas
 0,1866 ain mord' vnt ain aehter was /
 0,1867 vnt het manslaht begangen /
 0,1868 dar vmbe was er gevangen /
 0,1869 Pylatus liez in alle jar /
 0,1870 ain gevangen daz ist war /
 0,1871 zeir ostern da mit ert er si /
 0,1872 des waren si e gewesen vri .
 0,1873 ez getet dehain richtaer vor in nie /
 0,1874 dar vmb er in barraban lie /
 0,1875 seit daz si sein haeten gegert ./
 0,1876 er sprach "wes ist nv iesus w't"
 0,1877 "des toedes" sprachen die ivden cehant /
 0,1878 pilatus sprach "ir seit geschant /
 0,1879 sol ich iuern chvnick chrivcen /"
 0,1880 da beginnet div rede sich sprevcen /
 0,1881 Von den ivden er do gie /
 0,1882 iesum christum er do vieng /
 0,1883 er hiez in entnachten gar /
 0,1884 ze einer sevle gepvnten bar /
 0,1885 Da wart d' hohe chaiser riche /
 0,1886 geslage- so gar piterliche /

0,1887 daz sin svzer leip alda /
 0,1888 wart paidiv rot vnt pla /
 0,1889 von starcken gaiselen daz geschach /
 0,1890 daz nieme- nictes ganzez an im sach .
 0,1891 Ez was cerhowen vnt cerslagen /
 0,1892 daz wart gedvltlichlich vertragen .
 0,1893 Vberal sin plvt von im floz /
 0,1894 daz ez in vnt die seyle begoz /
 0,1895 dar nach wart im sein hovbet /
 0,1896 gar pitt'lich betovbet /
 0,1897 da wart im gedrvckt in /
 0,1898 ein scharfe chrone durnen /
 0,1899 drvch flaisch dvrch pain dvrch hirns march /
 0,1900 dise pitter marter starck /
 0,1901 twanck im ovz dem haupt daz plvt /
 0,1902 daz ez dem svezem christ gut /
 0,1903 vber div ovgen floz ze tal /
 0,1904 vnt in daz har vber al .
 0,1905 Dar nach wart im an gelait /
 0,1906 von pvrper ein spoetlich chleit /
 0,1907 vnt fvrt in gegen de- ivden dan /
 0,1908 do si in sahen zv ga-
 0,1909 si sprachen "va war her gat /
 0,1910 d' den tenpel ceprochen hat /
 0,1911 vnt in an dem drittem tag
 0,1912 hat wid' pracht daz was sin sag"
 0,1913 die ivden cherten allen irn fleiz /
 0,1914 an spot vnt an itwicz .
 0,1915 Si viengen ovch dvrch iesum /
 0,1916 symonem cireneum /
 0,1917 d' alexand's vater was
 0,1918 des roten als ich ez las
 0,1919 vnt twngen in daz er mvs tragen /
 0,1920 daz chrivce nv hoert ich sagen /
 0,1921 daz er gahes dar vnd' lac /
 0,1922 want er gvetes alters phlack .
 0,1923 Im was ce swaer daz chrivces sovm /
 0,1924 dv laiten si den swaeren povm
 0,1925 iesu vf die achsel sein /
 0,1926 des ewigen vat' schein /
 0,1927 gedultlichlich dar vnder gie
 0,1928 daz man in laesterlich an hie /
 0,1929 er trveg ez vntz an die stat /
 0,1930 als mich div schrif beweiset hat /
 0,1931 da er lait d' marter not /
 0,1932 als im div minne gebot .
 0,1933 Er wart an daz chrivce gestrackt /
 0,1934 vnt also pitterlich gerackt /

0,1935 daz man siniv lid gar /
 0,1936 het wol gezalt svnd'bar /
 0,1937 Ez wart d' raine sveze /
 0,1938 dvrch hent vnt dvrch fveze /
 0,1939 dvrchslagen mit drien nageln groz /
 0,1940 daz sein rainez plvt floz /
 0,1941 dar ovz den wnden gelich /
 0,1942 daz sveze plvt goltvarwe rieche .
 0,1943 Sus wart er erhangen d' gvt /
 0,1944 d' sere am chrivce plvet /
 0,1945 zwene shachaer im beneben /
 0,1946 erhangen wrden die ir leben /
 0,1947 heten mit vmpilde /
 0,1948 v'worht vf straze vnt i- vilde /
 0,1949 zwischen den hienck mitten /
 0,1950 iesel begynde pitte- .
 0,1951 Sein vater vmb die /
 0,1952 die in marternt hie /
 0,1953 d' schaecher d' ze d' winstern hant /
 0,1954 d' was iesmas genant /
 0,1955 d' was niht wol gelovbhaft /
 0,1956 er sprach "iesel hast dv die chraft /
 0,1957 daz dv gotes svn pist /
 0,1958 so loes dih vnt vns an dirre vrist ."
 0,1959 Der and' straft in dar vmbe /
 0,1960 er sprach: "dv armer tvmbe /
 0,1961 daz dv doch nicht fvrhtest got /
 0,1962 was tovckt dir in der not der spot /
 0,1963 wir leiden pillich den tot /
 0,1964 wir haben wol v'dienet al die not /
 0,1965 ab dirre herre nie vbel getet /"
 0,1966 do hveb er an sein gebet /
 0,1967 Er rvft iesum mit andaht an /
 0,1968 "herre gedenche armes man .
 0,1969 So chvmst du in dein reiche /"
 0,1970 christ sprach "ih sag dir waerliche /
 0,1971 dv wirst heute mit mir /
 0,1972 im paradise daz sag ich dir ."
 0,1973 Pilatus vb' daz chrivce schraib /
 0,1974 daz i- gehugde piz her ab belaib /
 0,1975 "ditz ist iesus von nazareth /
 0,1976 der ivden chvnic d' hie stet"
 0,1977 Daz schraib man nach dem willen sein /
 0,1978 ebraish / chriechis v-t latein /
 0,1979 Die ivden sprachen nicht schreib also /
 0,1980 "d' ivde- chvnic" wir sein s vnvro /
 0,1981 Dv solt schreiben daz er sin iah /
 0,1982 da engegen do pilatus sprach /

0,1983 "Daz ich geschriben han daz ist geschriben /"
 0,1984 sus waren die ivden v'triben /
 0,1985 daz si dar vmbe reten mer /
 0,1986 die schrif las man hin vnt her .
 0,1987 levt da genvge /
 0,1988 daz dovht die ivden vngefvge .
 0,1989a hie enphal got sein mvt' . sand Iohanns . unt sand Iohan . sand Mareie-
 0,1989 Pi dem chrivce stvende- da
 0,1990 iohannes vnt maria /
 0,1991 mit vil grozem hercenlaide /
 0,1992 stvenden si da paide /
 0,1993 Als si iesus stende sach /
 0,1994 zv in paiden er do sprach /
 0,1995 Von de- getriwem hercen sein /
 0,1996 "mvter sich d' svn dein /
 0,1997 iohannes sich din mvter /"
 0,1998 die na- er do vnt hute r /
 0,1999 in sien phleg alcehant /
 0,2000 d' svezen er sich vnd'want /
 0,2001 Die ivden chome- ovch al dar /
 0,2002 vnt namen seiner geberde war /
 0,2003 si sprachen zv im alsus /
 0,2004 "pist dv gotes svn iesus /
 0,2005 so gink ab de- chrivce her /
 0,2006 so gelavb wir an dich immer mer /"
 0,2007 si spoten sein manigen ende /
 0,2008 si rakten gegen im die hende /
 0,2009 vaste si sich rachen /
 0,2010 si chnieten nid' vnt sprachen /
 0,2011 "got grvze dich"
 0,2012 iesus daran niht cherte sich /
 0,2013 swie er wart gehandelt /
 0,2014 div svnne sich v'wandelt /
 0,2015 von siner not si iren schein park /
 0,2016 sich chlvhen die stainwende stark /.
 0,2017 Div erde ovch an d' stvnde /
 0,2018 vaste pittwen begvnde /
 0,2019 sich zart des tempels vmbeha-c
 0,2020 die livte erschrachten vnd wrden chranc /
 0,2021 d' svnnenschein wart gar v'dacht /
 0,2022 iz wart vinstre als div nacht /
 0,2023 von sext vntz hin ze non cit
 0,2024 die ivden gewunnen grozen neit /
 0,2025 von dem volk ub'al /
 0,2026 die ivden hvben gegen in vil grozen schal /
 0,2027 Benam d' was ein rehter man /
 0,2028 was vmpildes ist an im getan /
 0,2029 die ivden sprachen "iz ist also chomen /

0,2030 d' man hat der svnnen genomen
 0,2031 ir schein ez ist eclipsis /
 0,2032 vnt and's nicht des gewis ."
 0,2033 Iesus rvft lovt ze none /
 0,2034 vnd' einer dvrnein chrone /
 0,2035 er rvft also "hely heli /
 0,2036 lamazabactani /"
 0,2037 daz pedivtet sich svnd' spot /
 0,2038 iz sprichet also "mein got mein got /
 0,2039 war vmbe hast dv v'lazen mich /"
 0,2040 do sahen die ivden hind' sich /
 0,2041 vnt wrden an sinnen vnt an chreften lam /
 0,2042 si sprachen "diser rveft heliam /"
 0,2043 swas dirre wid'warten was /
 0,2044 die iahe- ob helias /
 0,2045 nv chom vnt in loese hie /
 0,2046 also iahen dise vnt die /.
 0,2047 Iesus sprach "mich dvrstet"
 0,2048 swi er doch was gefvrstet /
 0,2049 vb' elliv chvnicriche /
 0,2050 man pot im pitterlich /
 0,2051 ezzeich vnt gallen /
 0,2052 daz mvs im missevallen /
 0,2053 als er do bechorte daz /
 0,2054 do tranc er sin nicht fvrpaz /.
 0,2055 er sprach: consummatum est .
 0,2056 swen man daz an dem passen lest /
 0,2057 daz sprichet "daz ist geendet /"
 0,2058 des wortes mich ellendet .
 0,2059 Daz ovch ich nicht geendet han /
 0,2060 daz ich pillich het getan /
 0,2061 nah dem pilde des herren mein /
 0,2062 des dvrchlevhtic prehender schein /
 0,2063 wart dvrch mich so missevar /
 0,2064 an sinem antltz clar .
 0,2065a hie enphal got seinen gaist in seins vater hende .
 0,2065 Er sprach "ich enphilhe dir vater mein /
 0,2066 den gaist mein in die hende din /"
 0,2067 mit geneigtem hovpt er do lie /
 0,2068 seinen gaist zv im her do gie /
 0,2069 ain reter mit ainem sper /
 0,2070 daz was groz da mit stach er .
 0,2071 Iesv dvrch die seiten /
 0,2072 ein tiefe wnden weite /
 0,2073 an d' stat d' hailichait /
 0,2074 daz sper aldvrrch daz herze snait /
 0,2075 Vnt macht dvrch da ein witen rovm /
 0,2076 da von ain zwivaltic phlovrm /

0,2077 floz ovz sinem hercen gvet /
0,2078 d' ain wazzet d' and' plvt /
0,2079 daz geschach dv er was tot .
0,2080 nv was vol d' marter not .
0,2081a hie chlagt uns' frowe vnd' m chrivce irs chints tot .
0,2081 Maria disen sm'ze- sach /
0,2082 d' marter sw't ir sel dvrchstach /
0,2083 als ir e sagt symeon /
0,2084 daz ir vrvade iamers lon /
0,2085 prachte mit gesvche wider /
0,2086 ir vrevde slvech d' iamer nid' /
0,2087 Ir vrvade do mit vollen was
0,2088 dv si christes genas /
0,2089 swas si hiet vrevden an d' gebvrt /
0,2090 div fvr alle hie dvrch iamers furt .
0,2091 Dv si zv dem chrivce gie /
0,2092 da iesus plvetic vor ir hie /
0,2093 die iamaerliche pliche /
0,2094 die erwachten ir herce schricke /
0,2095 die marter die si an im laid /
0,2096 rechte als ain swert dvrch sei snaid
0,2097 sein marter ir daz herze prach /
0,2098 nv horet wie div sveze sprach /
0,2099 "owe mich meins hercen troest /
0,2100 was mich vrvenden hat erloest /
0,2101 div vil pitterliche marter dien /
0,2102 owe vil lieber svn mein /
0,2103 wie hangest dv so h're gvt /
0,2104 daz dein schoene hat pedact din plvt /
0,2105 wie pist dv erplichen /
0,2106 dein schoene ist dir entwichen /
0,2107 Yil liebz chrevce nv pit ich dich /
0,2108 hab dich her nider vnt la mich /
0,2109 zwischen meinen svn vnt dir /
0,2110 daz er rvwen mvz ovf mir /
0,2111 ovf meinen prvsten / daz ist mein ger /
0,2112 dvrch dein gvete mich des gew' /"
0,2113 Der pet wart si gar entw't /
0,2114 swie si s so inrechlichen het gegert /
0,2115 Do pat si auer fvrpaz /
0,2116 si sprach "owe w' geit mir daz /
0,2117 daz ih sterben mvg fvr di
0,2118 owe lieb' svn nv sprich /
0,2119 war ich mich ellende /
0,2120 in minem laide nv wende /
0,2121 want minem laid ist nicht gelich /
0,2122 owe sun wie iaemerlich /
0,2123 dv plvetic vor mir hangest /

0,2124 nie groz' angest /
0,2125 Gewan dehain mvter vm ir chint /
0,2126 alle frowen die nv sint /
0,2127 die helfen chlagen mine not
0,2128 vm mines lieben chinde tot /
0,2129 d' mir ist vil inrrechliche- lieb /
0,2130 d' hangt vor mir als ein diep /
0,2131 zwischen schaechern da zwein /
0,2132 div schoen vb' elliv schone schain /"
0,2133 Alsvs chlagt div vil svze /
0,2134 si chvst sine fvze .
0,2135 Si chert sich hin vnt dar /
0,2136 v-t nam der wnden vil recht war /
0,2137 si chlagt ieslich besvnder /
0,2138 ir sten daz was wnder /
0,2139 Daz si vor laide nicht viel /
0,2140 daz wazzer ir ovz den ovgen wiel /
0,2141 die haizen zaehere begvzen si /
0,2142 ir herce was do vrvnden vri /
0,2143 grozen iamer si bescheinte /
0,2144 von hercen si do weinte .
0,2145 Ioseph von arimathia /
0,2146 sah iesum iaemerlichen da /
0,2147 an des chrivces galgen hange-
0,2148 do chom er gegangen /
0,2149 ze pilato an d' stat /
0,2150 vmb den lichnam er in pat /
0,2151 daz er in liz nemen ab /
0,2152 pilatus iosepen do gab /
0,2153 d' edel decurio /
0,2154 nam in ab dem chrivce do .
0,2155 Nv m'chet an dem vil gveten /
0,2156 daz sine wnden plvten /
0,2157 dv er wart genomen ab /
0,2158 ioseph lait in in sein grab /
0,2159 Daz was niw vnt rain /
0,2160 erhowen vz aine- stain /
0,2161 dar in nie mensche wart gelait /
0,2162 ioseph het sich wol berait /
0,2163 mit schoenen lilachen /
0,2164 dar in hiez er in machen /
0,2165 er bestat in schoen nach d' e /
0,2166 vnt lait im mirren vn- aloe /
0,2167 zv im hvndert phvnt dar in /
0,2168 er chert ze dienst im alle sein sin /
0,2169 Die ivden daz grab bedachten /
0,2170 so si peste machten /
0,2171 mit ainem stain d' was groz /

0,2172 daz grab man vaste besloz /
 0,2173 Die ivden gedachten ovch dar an /
 0,2174 wie in von Pilato gewan /
 0,2175 ioseph vnt wie er in /
 0,2176 begrvb si sprachen “den gewin /
 0,2177 den er gewnnen hat /
 0,2178 d’ mvz im helfen an die stat /
 0,2179 Daz er besevften mvz die zit /
 0,2180 den leip er vns dar vmbe git
 0,2181 Ioseph mit nichodemo /
 0,2182 mvezen paid w’den vnvro /”
 0,2183 Si ahten daz si s wolden /
 0,2184 toeten vnt iesus holden /
 0,2185 swas si d’ begriffen da /
 0,2186 ioseph von Arimathia /
 0,2187 Si do geviengen vnt fvrten in hin /
 0,2188 in ein gewelbe wvrffen si in /
 0,2189 daz was vinster vnt starck /
 0,2190 si sprachen iesus wart nie so charck /
 0,2191 daz er in hie mvege gewinnen /
 0,2192 mit allen seinen sinnen /
 0,2193 Die tvr si ser v’slvzen /
 0,2194 rigel da fvr si shvzen /
 0,2195 die waren isnein vn- groz /
 0,2196 die rigel man fvr shoz /
 0,2197 an div sloz wrden gedrvcht /
 0,2198 insigel div nicht wrden ve’rvckt /
 0,2199 Annas vnt caiphas /
 0,2200 der slvzel phlagen swas d’ was .
 0,2201 so wolten in nach ir hohceit /
 0,2202 ertotet haben dvrh ir neit /
 0,2203 swie vast er was beslozen doch /
 0,2204 si schufen im hute dannoch /
 0,2205 Die for der tvr lagen /
 0,2206 vnd des gewelbs phlagen .
 0,2207a hie shvefen die ivde-vdem grab hvt
 0,2207 Der ivden fvrsten giengen do
 0,2208 zu de- richter pilato .
 0,2209 si sprachen: “ wir haben dar nach
 0,2210 der wort die der trugnaer sprach
 0,2211 iesus do er noch lept /
 0,2212 d’ ie wider vns strept .
 0,2213 er iach “ich wil am drittem tag /
 0,2214 ersten vo- tod” daz was sein sag /
 0,2215 da engegen schaf vns hvte /
 0,2216 vnt sprich gegen vns in gvte /.
 0,2217 Swas dv wellest daz tve wir /
 0,2218 daz sich wol gefvget dir /

0,2219 daz in sein ivnger hie icht steln
 0,2220 vnt sin tot da mit heln /
 0,2221 vn- iehent er sei erstanden /
 0,2222 von des todes panden /
 0,2223 so wrde groz d' christen schal /
 0,2224 vnde wrt d' ivngest irsal /
 0,2225 vil ser den d' erste /
 0,2226 vnt ist islicher d' herste .
 0,2227 Der giht: "ich han in gesehen."
 0,2228 daz en mac niht geschehen"
 0,2229 Pilatus sprach "nv hvtet wol /
 0,2230 als ir wizzet vnt man sol /
 0,2231 hvten waz sol des me /
 0,2232 hvtet als ez iv an ge /
 0,2233 Mine reter nemet gvt /
 0,2234 von den daz grab wiert behvt /"
 0,2235 die ivden dingten mit im cehant /
 0,2236 silb'phenninge vnt gewant /
 0,2237 gaben si den retern dar /
 0,2238 daz si des grabes naemen war /
 0,2239 Si paten hvten flizchlichen /
 0,2240 "dar vmb mach wir ivch riche /"
 0,2241 Daz grabe si svs behvten /
 0,2242 nv hoeret an christ dem gvtem /
 0,2243 wie loblich d' erstvnt /
 0,2244 als vns da von chvnt tvnt /
 0,2245 die hailigen / ewangelisten
 0,2246 die wol die warhait wisten .
 0,2247a hie erstvend got vom tod vn- fvr zehel .
 0,2247 Iesus d' vollen tugende reich /
 0,2248 fvr ze helle gewaltichlich .
 0,2249 Vn- prach d' hellen porten /
 0,2250 er sprach mit starchen Worten
 0,2251 "Ir helle fvrsten tvt vf div tor /
 0,2252 d' eren chvnich ist hie vor /"
 0,2253 "w' ist d' eren chvnich wer /"
 0,2254 Iesus sprach "daz ist d' /
 0,2255 d' starck vnd d' gewaltick /
 0,2256 d' h're an dem urluig sig."
 0,2257 Da mit er die helle prach /
 0,2258 als in dv adam an sach /
 0,2259 "ich sih die hant div mich beschvf /"
 0,2260 alsus was gegen im sein rvf /
 0,2261 Iesus die sein fvrte dan /
 0,2262 die sin willen heten getan /
 0,2263 die andern liez er dort fvr war /
 0,2264 pi den hellen schergen gar .
 0,2265a hie erlost got iosepen von de- charch' .

0,2265 Iesus fvr dv zehant
 0,2266 da er sin chnecht iosepen va-t /
 0,2267 in dem charcher v'porgen /
 0,2268 dar inne lag er mit sorgen /
 0,2269 dvrhliuchtichlich stain / er im erschain /
 0,2270 vnt fvr in dr ovz daz nie chain stain /
 0,2271 an dem charcher wart v'rvckt /
 0,2272 von da-ne er loblich wart gezvckt
 0,2273 vnt satz in arimathia /
 0,2274 da er belaib sorgen vri .
 0,2275 Daz tet er gewaltige Christ
 0,2276 swie ez doch nicht geschriben ist /
 0,2277 an dem ewangelio
 0,2278 so ist ez doch benam also /
 0,2279 ez ist endlichen war /
 0,2280 daz er in mit der gevangen schar /
 0,2281 lost daz was pilliech /
 0,2282 iz ist der warhait wol geleich /
 0,2283 wand er dvrch in gevangen was .
 0,2284 pilleich er von im ovch genas .
 0,2285 Des ersten er lobliche erschaein /
 0,2286 daz ist zwivel dehain /
 0,2287 daz daz div rechtiv warheit sei /
 0,2288 daz mvgt ir v'sten da pe\y'
 0,2289 daz er in loste ze mitt'nacht /
 0,2290 e die ivden mit ir chraft /
 0,2291 chome- fvr den chaercher /
 0,2292 den si des morgens fvnden lere .
 0,2293a hie cho- d' engel ze m grab
 0,2293 Ein engel chom von himelriche /
 0,2294 des chlait sne schoene gelich /
 0,2295 gaben d' gieng zv dem grab /
 0,2296 de' grozen stain wielg er ab /
 0,2297 Vnd saz oben vf den stain
 0,2298 sin amplichk lieht vorhtlichen schain /
 0,2299 ez was drvchlivchtick clar /
 0,2300 daz die hveter / v'zagten gar /
 0,2301 daz si fvr tot viele- hin /
 0,2302 ane chraft vnd ane sin .
 0,2303 Drei frowen chomen gegangen /
 0,2304 den engel sahen si verhangen /
 0,2305 mit ainer schone stole wiez /
 0,2306 ze svchen was d' frowen fliez .
 0,2307 Si erschracten von d' angesicht /
 0,2308 d' engel sprach "fvrht iv niht
 0,2309 Ir svchet den gechrivtzten christ
 0,2310 wizzet daz er hie nicht ist /
 0,2311 er ist erstanden loblich /

0,2312 nv get h' alle gelich /
 0,2313 vn- seht selben da er wart gelait /"
 0,2314 des waren die frowen dv berait /
 0,2315 Vnt gienge- doch mit forhten dar
 0,2316 vnt sahe- dr in do was ez war .
 0,2317 Er sprach: "ir frowen nv get hin /
 0,2318 ze sein ivngern vnt sagt in /
 0,2319 Vnt pet'n vnd den sein /
 0,2320 daz er in welle erschein
 0,2321 In galilea waerlich /"
 0,2322 die zwo frowen schieden sich /
 0,2323 die zwo giengen div dritte pelaib /
 0,2324 wa-t sei div minne vf svchen traib .
 0,2325 Maria magdalena /
 0,2326 pelaib pi dem grabe da /
 0,2327 wie offte si in daz grabe sach /
 0,2328 mit sevftundem hercen si sprach /
 0,2329 "owe daz grab ist laere /
 0,2330 we mines herce- swaere /
 0,2331 Svzer herre wa vind ich dich /
 0,2332 owe w' sol nv troesten mich /"
 0,2333 von hercen si do chlagte /
 0,2334 aein lvtzel ez do tagte /
 0,2335 Dv erschain ir iesvs d' haeilere /
 0,2336 als er w' aein gartnaere /
 0,2337 Er sprach "vm wev wainest dv wiep /
 0,2338 de- so svchet inrechlichen din liep"
 0,2339 Dv in maria an sach /
 0,2340 si chant sein niht zv im si sprach /
 0,2341 "Sag mir hast dv in vf erhaben /
 0,2342 wa hast dv in begraben /
 0,2343 zaig mir wa laeist dv in nid'
 0,2344 herre nv gib mir in wid' /"
 0,2345 pei namen er sei do nande /
 0,2346 sa zehant si in bechande /
 0,2347 er sprach zv ir "maria /"
 0,2348 do bechant si in sa /
 0,2349 Div vil raeiniv svze /
 0,2350 viel im fvr die fvze /
 0,2351 do trat ih-s hin dan /
 0,2352 "dv solt mich niht rvren an /"
 0,2353 Sprach er "wand ich noch niht pin /
 0,2354 zv meinem vater chomen hin /
 0,2355 dv ginc zv meinen prvedern dar /
 0,2356 vnt sag in von mir daz ich var
 0,2357 ze meinem vater" ceha-t si gie /
 0,2358 du widerfveren ir zwene hie /
 0,2359 vf d' wekschaide /

0,2360 Ioh-es vnd peter die paide /
 0,2361 Si sprachen “was hast dv gesehen .
 0,2362 Maria des solt dv vns v’iehe- /”
 0,2363 si sprach “gern daz tvn ich /
 0,2364 wand er hat getrostet mich
 0,2365 ich sach des lebentigen christes grab /
 0,2366 da was d’ stain genom- ab /
 0,2367 Ich sach da dennoch mer /
 0,2368 des erstanden christes er /
 0,2369 ich da nach minem willen sach
 0,2370 d’ gyte gvetlichen mit mir sprach”
 0,2371 Die ivnger sprachen “wir schvelen ir daz /
 0,2372 gelavben wol si waiz ez paz /
 0,2373 den die ivden lughaft /
 0,2374 an ir maeren leit div chraft /”
 0,2375 zehant schieden si vo- ir /
 0,2376 vnt liefen enwek als div tir /
 0,2377 Si chomen vf daz rechte spor /
 0,2378 Iohannes lief pet’n v’re vor /
 0,2379 vnd chom zv dem grabe e hin /
 0,2380 er stvnd da vor vn- chom niht dr in /
 0,2381 d’ and’ der hin nach da lief /
 0,2382 den dovht daz grab nicht ze tief /
 0,2383 er n stige zehant hin ab /
 0,2384 vn- ersvchet daz grab /
 0,2385 vnt vant da niht mer /
 0,2386 wand div tvech . div zaigt er .
 0,2387 Da christ was in gepvnten /
 0,2388 niht anders wart da fvnden
 0,2389 Er sprach “seht ir gesellen /
 0,2390 alle die ez sehen wellen /
 0,2391 hir in was gebvnden christ /
 0,2392 daz grab noch also offen ist /
 0,2393 d’ lichname- ist da fvnden nicht /
 0,2394 daz grab ma- stente offen sicht /
 0,2395 Er ist loblich erstanden /
 0,2396 von des todes panden /”
 0,2397 hie von si chraft geviengen /
 0,2398 von danne si do giengen .
 0,2399 Dar nach in vil chvrzer vrist /
 0,2400 do erschain in der vil svzer christ /
 0,2401 petern da er was aine /
 0,2402 in troest d’ svze raine
 0,2403 loblich er ovch erschain /
 0,2404 den drien frowen gemain /
 0,2405 die wolten in gern behapt han /
 0,2406 do mocht ez also nicht ergan .”